



دار الوقف العربي

سلسلة
الأعمال
الأدبية

الكلمة
الآن
للدفاع

«مسرحة»

تأليف
لينين الرملى



دار الوقف العربي

الكلمة الآن للدفاع

تأليف

لينين الرمحى

١٩٨٠

الفصل الأول

المشهد الأول

- حجرة خالية من أى أثاث
- باب غرفة الى اليمين
- مدخل الى اليسار ينكشف عن الردهة الخارجية للشقة وباب الشقة •
- نافذة مغلقة •
- جرائد قديمة وبعض الأشياء المهملة على الأرض •
- الوقت نهار •
- المكان : مدينة القاهرة •

- محمود .. فى الثلاثين .. متوسط القامة ..
نحيف .. يقف فى المنتصف .. نظراته
مباغمة .. بعد لحظة يدور حول نفسه
ببطء ، وبلا هدف .

- صوت نبيلة يأتى من الداخل .

نبيلة : (من الداخل) محمود ..

محمود : (شاردة) أيوه ..

نبيلة : انت فين ؟

محمود : (بعد لحظة) هنا ..

نبيلة : تعال .

(محمود يتحرك كالنائم ويخرج من باب
اليسار .. تمر لحظة)

نبيلة : (من الداخل) محمود ..

محمود : (من الداخل) أيوه ..

(نبيلة تدخل من باب اليمين ..

فى الخامسة والعشرين .. متوسطة الجمال ..
ترتدى ملابس بسيطة ... تبحث بعينيها فى
الحجرة) .

نبيلة : انت رحت فين تانى ؟؟ انت سامعنى ؟

(لا تسمع زدا ، تتحرك نحو باب اليسار ..
بينما يظهر محمود داخلا من نفس الباب ،
فتتوقفا عن اندفاعهما) .

نبيلة : دوختنى ..

محمود : (ينظر لها ولا يرد) ...

نبيلة : تعال .

محمود : ليه ؟

نبيلة : بس تعال .

(تسحبه من يده الى حجرة اليمين .. يمشى
مستسلما .. يخنقيا نبرة .. ثم يعود محمود
ويتجه للمنتصف .. تظهر نبيلة خلفه .)

نبيلة : انت لحقت شفت حاجة ؟

محمود : شفت ..

نبيلة : وايه رايك ؟

محمود : كويسة .

نبيلة : دى هايلة .. الأوض واسعة والايجار معقول .. والله
ما حتلاقى احسن منها .. استنى .. الشباك ده ببص
على ايه ؟

(تفتح النافذة ، يدخل ضوء النهار وضوضاء
الطريق .. محمود يسد أذنيه .)

نبيلة : ده ع الشارع العمومي .. اهو احسن مكان لليافطة
هنا ، تحت الشباك . (تغلق النافذة وتستدير له) .

نبيلة : انا لو منك أكتب المقد النهارده .. دلوقتي .. الله .
ما بتدريش ليه ؟

محمود : أبدا .

نبيلة : لا .. انت ساكت من ساعة ما دخلنا .

محمود : (يهز كتفيه كأنه لا يجد ما يقوله) .

نبيلة : انت لسه متضايق ؟

محمود : من ايه ؟

نبيلة : عشان القضية اتاجلت .

محمود : لا .

نبيلة : امال ايه ؟ مش انت اللي عايز الحرية .. طب آدى

الحرية ايه .. حيبقى لك مكتب تتصرف فيه زى ما انت

عاوز ، ماحدش حيتحكم فيك ، المهم تشتغل ومتكسلش ،

وبكره تشوف لو مكنتش تبقى اكبر محامي في مصر

و ..

محمود : (مقاطعا) نبيلة .. انتي مش قلتي الكلام ده قبل كده ؟

نبيلة : يا سم ! وحفضل اقله لحد ما تقنع .

محمود : ما كنتش جيت هنا ولا لفيت ده كله .

نبيلة : ياه .. ده احنا لفينا كتير فعلا .. تصور بقى اني

ما حسستش بالتعب الا دلوقتي .. انت ما تعبتش ؟

محمود : تعبت ..

نبيلة : اخس .. انت كمان ؟ عيب قوى لما الرجالة تتعب زى

السنات .

محمود : ما هو الرجالة بتتعب لأنها

(ثم يسكت وكأنما زهد في الكلام) .

نبيلة : لأنها ايه ؟

محمود : لأنها رجاله .

نبيلة : (تعبت بزر قميصه) مش كل الرجاله بقى ، اسمح لى ،
الراجل العظيم ما يصحش يتعب .

محمود : يعنى أنا عظيم ؟

نبيلة : أعظم راجل فى الدنيا .

(محمود ينظر لها ثم ينفجر فى الضحك بغير
توقع .. نبيلة تبتعد عنه فى قلق .. وتذلفت
حولها) .

نبيلة : هو البواب ساينا وراح فين ؟

محمود : (بعد لحظة) ملاحظتيش حاجة واحنا داخلين ؟

نبيلة : (بتوجس) حاجة زى إيه ؟

محمود : الشقة اللي فوق دى .

نبيلة : مالها ؟

محمود : ما هى دى تبقى مكتب محمد .

نبيلة : مش معقول .. وماقلتش م الصبح ليه ؟

محمود : دى الياقطة طول كده .. محمد عبد العزيز المحامى ..

إزاي ماشقتيهاش ؟

(يدخل بواب العمارة)

البواب : لا مؤاخذه .. انشالله تكون الشقة عجبتكم .

محمود : مش بطاله .

نبيلة : (بسرعة) بس الخلو كتير قوى ..

- البواب : دى حاجة فى ايد البيه صاحب العمارة ولا مؤاخذه .
- محمود : وهو فين ؟
- نبيلة : والأرض كمان ضيقه .
- البواب : هنا قريب .
- نبيلة : نفوت عليه وقت تانى .
- محمود : بتقول قريب ؟
- البواب : ايوه ، تديله خبر بالتليفون لو تحب حضرتك .
- محمود : مانيش مانع .
- نبيلة : واحنا حنفضل ولقفين كده ؟
- البواب : دقيقة واحدة اجيب كراسى ، عن اذنكم .
- (البواب يخرج . . نبيلة تقرأ افكار محمود . .)
- محمود يتمشى للنافذة) .
- نبيلة : محمود . . انت حتاخذ الشقة دى بجد ؟
- محمود : ليه لا ؟
- نبيلة : يعنى الدنيا ضاقت عشان تفتح مكتبك جنب مكتبه ؟
- محمود : ايه . . . خايفه نخطف الزباين من بعض ؟
- نبيلة : لا طبعا ، بس مش فاهمه السبب اللى مخليك تصمم على الشقة دى بالذات .
- محمود : مانيش . . انتى اللى قلتي عليها كويسه .
- نبيلة : ماكنتش عارفه .

- محمود : ولا أنا •
- نبيلة : لا عارف لأنك دائما بتيجي لمحمد هنا •
- محمود : أيوه ، لكن السمسار قدامك لما قعد يلف بيينا ، ما قلناش انه حيبيينا هنا •
- نبيلة : ولا جينا فعلا ، ليه سبتنا نطلع ونفترج عليها •
- محمود : (مهاجما) انتي بتكبرى المسألة من غير داعي •• انه مش شايف فيها حاجة •
- نبيلة : وبرضه مافيهاش حاجة لو دورنا على مكان تاني •
- محمود : لسه خندور ؟
- (البواب يدخل حاملا مقعدين) •
- البواب : اتفضلوا •
- نبيلة : (للبواب) اجنا حنستنى كتير ؟
- البواب : لا ، أنا رايح اكلمه فى التلافون ؟ هو •
- محمود : الكراسى دى مئين ؟
- البواب : من مكتب الأستاذ محمد اللي فوق دى طوالى •
- (نبيلة ما تكاد تهتم بالجلوس حتى تعتدل) •
- البواب : ماهو لا مؤاخذه محامى برضك ، ابن حلال زى حضرتك ويخدم كل الناس ، عن أذنكم •
- (يخرج البواب) •
- (محمود يتشعل سيجارة وينفث دخانها ببطء)
- (نبيلة تتمشى جيئة وذهابا) •
- محمود : انتي مش كنتي تعباناه وعاييزه تقعدى ؟

(نبيلة تتوقف ، تهم بأن تقول شيئاً ثم تسكت .. تسير للمقعد وتجلس متنهدة ببأس) .

نبيلة : مافيش فايده ، اللي فى دماغك فى دماغك .

محمود : صديقنى ، مافيش حاجة فى دماغى .

نبيلة : (بعناد طنولى) لا فيه .

محمود : طب فهمينى .

نبيلة : مش عارضه بالخطب .. انما انا حاسه ان فيه حاجه وبس ، انا فهماك كويس ، اكتر من نفسك .

محمود : انتى ما بتحبيش محمد .

نبيلة : بالعكس ، محمد مش ابن عمى وبس ، محمد صاحبى من زمان ، زى ما هو صاحبك ، وكان ممكن احبه وانا لسه بنت صغيره .

محمود : مقصدش انك بتكرهيه ، لكن مبتحبيش تشوفى علاقتنا مستمره لحد دلوقتى لأن ده ما يرضيش غوروك .. كنتى متوقعه تشوفينا بنخسر بعض علشانك ..

نبيلة : (باستنكار) ده رايك فى ؟ .. طيب اتلقى الت وهو .
(تتحرك بعصبية ثم تستطرد فجأة) لكن مش حتغير رأىى .

محمود : (برقه) ما هو مش معقول تيجى النهارده وتحكمى على علاقتى بمحمد ، دى حاجه مجش يقدر يعرفها كويس غيرى انا وهو .. احنا اتربينا سوا .. وكبرنا سوا .. كنا بنام فى سرير واحد ، وناكل من طبق واحد ، ونذاكر على مكتب واحد ..

نبييلة : وتحبوا بنت واحد .

محمود : (ينظر لها ويسكت) .

نبييلة : انما كل ده ما يمنعش انك انت حاجه وهو حاجه تانيه ،
كل واحد فيكم غير التانى خالص .

محمود : مش لازم الناس تبقى زى بعضها بالظبط عشان
تبقى صحاب .

نبييلة : مش كلهم ، فيه ناس ماتطيقش اى حد مايبقاش زيها .

محمود : ناس مين ؟؟؟

نبييلة : انت .. انت نفسك .

(صمت متوتر يتبادلان خلاله نظرة طويلة ..
محمود يظهر فى الردهة الخارجية . فى نفس عمر
محمود ، أكثر امتلاء منه .. يجتاز الردهة
بهدهوء ويقف يتأملها برهة) .

محمود : (فجأة) اما افتوا اوغاد بشكل .

(محمود ونبييلة يلتفتان وقد اخفتهما المفاجأة)

محمود : محمد ؟

محمد : ده الكاتب بتاعى قالى انه شافك هنا ، ماصدقتش .

محمود : مفاجأة .. مش كده ؟

محمد : (وهو يخطو للداخل) استنى على .. ازيك يا بنت
عمى وازى عمى وطنط ؟

نبييلة : كويسين ، ازيك انت يا محمد .

محمد : وحشانی موت ؟ وکل ما أقول للواد ده یجیبک معاه
مره ، یطنش ، ولا انتی للی مش عایزه تشوفینی ؟
نبیلة : یا خبر ..

محمد : ایه یاسیدی بقی المفاجآت بتاعتک دی ؟
محمود : تصور ، بقالنا ساعتین بفلج مع السمسار ، ماعجبناش
ولا شقه .. والآخر لقیته جابینا علی هنا ..
محمد : یعنی ما قتلایش انک عایز شقه .. انتوا خلاص نویتوا ؟

نبیلة : هو انت ما تعرفش انه سباب الشرکه .

محمد : سباب الشرکه یعنی ایه ؟

نبیلة : قدم استقالته .

محمد : لا ؟ .. مش معقول ..

محمود : لیه ؟

محمد : آه صحیح لیه ، ما انت اهل وتعملها .

محمود : ما هو اصلک مش عارف ایه الی حصل قبل ما قدم
استقالتی بشویه صغیرین .

محمد : حصل ایه ؟

محمود : فصلونی .. رحت اقدم استقالتی لقیتهم فاصلینی

محمد : یا ساتر .. عشان ایه ؟

محمود : (ساخرا) عشان یحرمونی م البطوله یا سیدی .. حتی
لو کانت الاستقالة راحت لهم بحری ، اکید کانوا
حیرفضوما وبعدين یفصلونی فی ساعتها .

محمد : مش تفهمنى انت عملت ابيه بالظبط .

نبيلة : اترافع ضد الشركة .

محمد : (غير منتبه) وبعدين ؟

نبيلة : وبعدين ابيه ؟ اترافع ضد الشركة بدل ما يترافع عنها ..

محمد : آه .. لا ؟ يخرب عقلك (يقهقه) ويضرب محمود على كتفه) انت مش حتبطل الجنان ده .. تعال احكيلى ايه اللى خلاك تعمل كده .

محمود : (زاهداً فى الحديث) مافيش ، الخصم اصله موظف قديم فى نفس الشركة . والشركة فصلته فرفع عليها قضية .

محمد : كويس .

محمود : درست القضية ، مالمقتش اى حجة ضده ، اترافعت فى صالحه .. كسب القضية .

محمد : وخسرت انت .

محمود : وليه بتسهميها خساره ؟

محمد : لأنك خسرت فعلاً .. الوظيفة اولا وسمعتك كمحامى ثانياً ، كفايه انك اترافعت ضد الناس اللى موكلينك .

محمود : وهما اشترونى ؟ ثم انا ماعملتش كده .. انا محامى الشركة يعنى مهمتى اُدافع عن كل الموظفين اللى فيها ..

محمد : لكن بما ان الموظف ده اتفصل ..

محمود : فصل تعسفى ، بدليل انه حيرجع وظيفته ويصرف كل مستحقاته بآثر رجعى .

نبيلة : حيلكم ، انتوا مش فى محكمة .

محمد : لكن انت ما استفدتش حاجه ، رجعت المفصول واتفصلت بداله .

محمود : برضه فصل تسفى .

محمد : يعنى حترفع عليهم قضية ؟

نبيلة : يا ريت .. مش بقولك استقلال .

محمد : (ينظر لمحمود كما لو كان حيوانا غريبا) .

محمود : زهقت .. الواحد ممكن يدافع عن حاجه مؤمن بيها ، انما ازاي الانسان يفضل طول عمره ملزم يدافع عن حد لمجرد انه بيشتغل عنده ، انه كاتب معاه كونتراتو ..

محمد : (يتنهد ثم يقول لنبيلة) جوزك ده تحفه من يومه ، انا فاكر مره واحنا عيال صغيرين كنا بنلعب كوره شراب وغالبين بفرق جون واحسد ، انما كنا بنلعب باستهتار .. الكابتن محمود اتفرغ ، تعرفى عمل ايه ؟ خد الكوره منى ومن زمايله وبدل مايطلع بيها لقدام رجع مع الجون بتاعه .. وحط فى نفسه جون .. (محمد يضطك ، ونبيلة كذلك ، محمود يبتسم) .

محمد : احنا وقفنا ده خيرلين ، ايه ده يامحمد ، ؟ قال « ايه » .. تستاهلوا عشان تلعبوا بجد .. ، من غيظنا اتلمينا عليه كلنا وضربناه حقة علقه .. فاكرما ؟

محمود : فاكرما كويس .

نبيلة : (بشقه) ضربوك بصحيح ؟

محمود : (لحمد) أيوه ، بس يومها كسينا .

نبيلة : (احمد) واتمور يا محمد ؟

محمد : الحق بلبل مخضوضه عليك .. ده زمان واحنا عيال .
(لحظة صمت مفاجئة)

محمد : الله .. احنا واقفين كده ليه ؟

نبيلة : البواب يعنى ما ردش علينا .

محمد : ما هو بيتكلم من عندى ، تعالوا نستناه فى مكتبى .

محمود : قولى الاول .. ليه رايك ؟

محمد : ودى عاوزه سؤال .. ما انا يا ما قلت لك ما فيش احسن
م للعمل الحر ، اياك تكون آمنت بالله .

محمود : يعنى اخدنا ؟

محمد : على طول ، المكان هنا مش بطل ، وحنبقى جنب بعض
يا اخى ، ما تضيعش وقت وافرشها من بكره .

نبيلة : وده معقول ؟

محمد : اسلفك مكتب وكام كرسى فى الاول ، والباقى تشتريه
بالتقسيط ، المهم تبتردى يا بطل .

محمود : عندك حق .

محمد : طبعا عامل حساب الخلو والمقنم والحاجات دى ؟

محمود : يعنى .

محمد : يعنى دى تبقى .. زى العاده .. مش كده ؟؟
(يضحكان)

محمد : على أى حال أنا تحت أمرك .. آه شوف كنت حنسى
القضية إياها حصل فيها إيه ؟

نبيلة : اتأجلت .

محمد : تانى ؟؟ معلىش ..

(يدخل البواب)

البواب : البيه بيقول لحضرتك تعال له بكره الساعة حداثر .

محمد : طب عال ، اتفضلوا بقى ، دقيقتين واخلص م الزباين ؟

البواب : واحد عايز حضرتك ع التلفون اسمه فؤاد سامى .

محمد : آه ، يا خبر .. ياللا يا جماعه ، حصلونى عقبال
ما أرد ع التليفون (يخرج مسرعا) .

(البواب يحمل المقعدين ويخرج كذلك) .

محمود : قللى إيه يا نبيله ؟

نبيلة : (بسرعه) ما تلخدش رأيى .

محمود : ليه ؟

نبيلة : عشان ما بتتصدقش ده بجد ؟

محمود : (مبتسما) طب ياللا ..

نبيلة : (لا تتحرك) على فكره ، أنا بتتصايق لا محمد بيقول
عليك جوزى ؟

محمود : وفيها إيه ؟ بينهز ؟

نبيلة : بحس انه شمتان فى عشان ما رضىيئش بيه ؟

محمود : بيتهايك ؟

نبيلة : تفكر محمد لسه بيحبني ؟

محمود : معرفش :

نبيلة : (بتهمك خفيف) ازاي ؟ انت مش صاحبه ؟

محمود : ما يهمنيش أعرف .

نبيلة : (بالحاح) ليه ؟

محمود : لأن دي حكاية قديمه ، وعمرها ما كان لها دخل في علاقتنا احنا الثلاثة .. افكر احنا ناس ناضجين وما فيش داعي نتصرفي زي البنات اللي عقلها صغير .

نبيلة : أشكرك .

محمود : (بضيق) انتي مش بتحسي بنفسك يا نبيلة ، انتي بتغيري من محمد وعاوزه ... (يتردد لحظة) .

نبيلة : (بهدوء) أفرق بينكم .

محمود : أنا ما قلتش الكلام الفارغ ده .

نبيلة : (بخنان) انت فاعمنى غلط يا محمود ، أنا بس خايفه عليك .

محمود : اسمعي يا نبيلة ، أنا حقولك على حاجه .. لما محمود عرف اننا بنحب بعض ، اتصدم ، انتي كان نفسك تسمعي ده واديني بقولك .

نبيلة : مش عايزه اسمع حاجه .

محمود : زعل طبعا .. اى انسان فى مكانه طبيعي يزعل .. انتي عارفه كان بيحبك قد ايه ، انما ما اتصايقتش منى او منك .. بلاش كده ، نقول ، .. نقول انه اتصايق

شويه ، برضه ده طيبى .. انا نفسى اتضايقك منه
ما اعرفش ليه .. اتضايقك منه ومنك ومن نفسى ..
وانتى كنتى حاسه بالخجل مع اننا ما خدعنهوش ،
ودلوقتى الحكاية اتنست ، لازم نبقى اكبر من ده
كله .

نبيلة : افهمنى يا محمود ، انا مش خايفه من محمد ، انا ، انا .
مش عارفه ، خايفه بس مش عارفه من ايه .. اصل
كل واحد فيكم غير الثانى خالص .

البواب : (دلخا) لامؤاخذه ، السمسار عايز الحلاوه عشان
يمشى .

محمود : آه .. حاضر ..

(يخرج خلف الباب)

(نبيلة تنظر حولها بتفكير)

نبيلة : وفيها ايه صحيح .. يمكن انا فعلا عبيطه .. انا بخاف
على محمود عشان بحبه .. المهم اقف جنبه لحد
ما يستقر .. محمود بيفكر كثير ودماغه ناشطه ،
بيتصرف زى الأطفال بالظبط .. لو يسمع كلامى بس
سنه بالكثير وكل حاجه تبقى كويسه .
(تسير عدة خطوات وهى تتأمل الشقة)

الأوضة اللى بره حتبقى استقبال للزباين .. والأوضة
دى للراحه ، يقعد فيها لما يزهرق م الشغل .. وهنسا
المكتب ، لا هنا تحت الشباك .. والمكتبه وراه .. وهنا
كنبه واثنين قوته .. بطراييزه صغيره عليها فازه ..
صاعتها محمود يستقر وباله يروق ويفضالى ..
(تتراجع بظهرها خارجة وهى تبسم)

(يظهر شخص في الردهة الخارجية ، يتقدم
ببطء) .

(نبيله تلقفت وتراه وتنظر له بتساؤل ..
للرجل يتلفت حوله بدهشة وإرتباك) .

الرجل : من فضلك هو .. هو مكتب الأستاذ محمد عبد الرزاق
منا ... ولا انا غلطان ؟

(نبيله لا ترد)

(انظلام)

* * *

المشهد الثانى

- بعد مرور عدة أشهر •
- نفس الحجرة : لكنها الآن مؤثثة على النحو الذى تخيلته نبيلة فى نهاية المشهد السابق •
- على مقعد فى أقصى اليمين يجلس رجل فى حوالى الأربعين ، طويل وضخم الجثة يرتدى بدلة فضفاضة ، يبدو عليه الارتباك وقد وضع فوق ركبتيه صندوقا من « الكرتون » يحوطه بيديه فى حرص •
- يظهر صادق كاتب المكتب ، فى الحلقة الخامسة أو أكثر ، يرتدى بدلة رثة ، يحمل صينية عليها كوب شاي •• يقدمه للرجل •

- صادق : اتفضل .
- الرجل : (بدهشة) متشكر • : انا ما طلبتش .
- صادق : ودي تيجي ؟ • ده واجب • • اتفضل .
- الرجل : بس • • اصل • •
- صادق : لا يمكن • • على الطلاق بالتلاته • •
- الرجل : طيب • • متشكر • •
- (الرجل يرتبك وهو يتناول الكوب لانشفال
يديه بالصندوق) •
- صادق : (مشيرا لطاوله صغيره) حط الصندوق هنا •
- الرجل : لا • • خلاص • • متشكر • •
- (يضع الكوب على الطاوله ، ثم يسأل) •
- هو الأستاذ محمد حيناخر كثير •
- صادق : لا زمانه جاي • • اتفضل اشرب الشاي • • اهلا وسهلا • •
- (جرس التليفون يدق وصديق يتحرك ويرد) •
- صادق : الو • • ايوه يا فندم • • هنا مكتب الأستاذ محمود
عبد المجيد •
- (الرجل الذي هم بارتشاف الشاي يتوقف
وينظر ناحية صادق بدهشة) •
- صادق : لا • • هو في الحكمة م الصبح • • نقوله مين ؟ حاضر • •
مع السلامه •
- الرجل : (ينهض بحيره) هو ده مش مكتب الأستاذ محمد
عبد الرزاق ؟

صادق : (بابتسامه لزجه) ايوه .. امال .. لا .. ما هو ..
في الحقيقة ..

الرجل : يعنى ده مش مكتب الاستاذ محمد ؟

صادق : هه ؟ في الحقيقة .. لا ..

الرجل : امال جيتنى ليه من ع السلم وقلت لى

صادق : اصل انا قلبى عليك .. الأستاذ بتاعنا أفوكاتو مافيش.
زيه ، وانا عايز اخدمك .

الرجل : ايوه .. لكن ..

صادق : اقعد انت بس واطمن .. انا بقالى خمسہ وعشرين سنه
بشغل مع محامين واعرف الشاطر م الخايب .. انا
عايز اخدمك .

الرجل : متشكر .. انما .. اصل ..

صادق : اصل الأستاذين بيشتغلوا شركة مع بعض .. مكتبهم
واحد .. وانا عايز اخدمك .. اشرب الشاي .

الرجل : حاضر .

(يجلس باستكانة)

صادق : اتفضل الشاي .. اهلا وسهلا ..

(محمود يدخل حاملا حقيبة أوراق .. يهز
رأسه تحية للرجل ثم يتجه للمكتب .. صادق
يسرع نحوه ويخطف منه الحقيبة بعنف)

صادق : عنك يا أستاذ .. عنك .. خير انشاء الله .. مش
برضه كسبنا القضية ؟

محمود : اتاجلت .

صادق : تانى ؟ (ثم بحماس) انما بان الله حنكسيها .

محمود : (لنفسه بغموض) مش باين .

صادق : وهو معقول حضرتك تترافع فى قضية وما تكسبهاش ؟

طلب د حضرتك عليك مرافعه بليفه بشكل ٠٠ اى والله .

محمود : عم صادق ٠٠

صادق : ايوه يا متر .

محمود : انت عمرك شفتلى بترافع ؟

صادق : لا يا استاذ ٠٠٠٠ انما سمعت ٠٠

محمود : من مين ؟

صادق : (دون ارتباك) الا من مين ؟ من كل الناس يا متر .

محمود : (بهدوء) انا مش قايلك انى بكره الكذب .

صادق : (بطلاقة) حاشا لله يا فنعم ، واكذب ليه ؟ دى حتى

مسأله مش محتاجه سمع ٠٠ الواحد يشوف سعادتك

يفهمها لوحد ٠٠ اى والله .

محمود : (بحدّة) كفايه .

(صادق يهم بالكلام ثم يسكت) .

محمود : حد سال على ؟

صادق : ايوه ٠٠ عم سيد بتاع كشك السجاير .

محمود : قلت له انه خسر القضية ؟

صادق : (يلتفت ناحية الرجل ثم يهمس لمحمود) لا يافنجم .
عيب .

محمود : عيب ايه ؟

صادق : لو بلغته في التليفون مش حنشوف وشه ولا بقية .
الأتعاب .

محمود : على اى حال هو ما حيلتوش حاجه .

صادق : وياريت عاجب ، ده زعلان ان حضرتك اعترفت انه دفع
رشوه .

محمود : الأدله ضده .. انكر ازاي ؟ أنا حاولت اثبت انه
ما يقدرش ياخذ حقه الا بالطريقة دي .. نهايته ..
مين غيره ؟

صادق : الأسطى مصيلحي بتاع مصنع النسيج .

محمود : قلت له انه خسر القضية ؟

صادق : (يلتفت بضيق ناحية الرجل ثم لمحمود) لا طبعاً
يا فندم .. عيب ..

محمود : (ينظر له بغیظ) .

صادق : (بسرعة) هو اللي عرف لوحده .

محمود : عايز يستائف ؟

صادق : أيوه .. بس هو ولا مؤلخذه طالب سحب القضية .
م المكتب ..

محمود : أنا مهمته م الأول اننا مبنشتغلش بشهود زور .

صادق : لكن ده الحق معاه يا فندم والغاية تبرر الوسيلة ..

محمود : (مقاطعا) فيه حد تانى ؟

صادق : الحاج عيش .. انتظر حضرتك وبعدين قال حيفوت بكركه .

محمود : انا مش منبه عليك القضايا اللي زى دى

صادق : (مقاطعا) يا فندم الرجل حلف لى بشرفه وبالقُرآن المجيد انه ماخدش خلوم السكان .

محمود : عندنا قضايا ايه دلوقتى ؟

صادق : دلوقت .. دلوقت ؟

محمود : أيوه ..

صادق : مافيش (ثم مستدركا ومشيرا بخفنه الى الرجل) غير حضرته بقى (ثم مامسا بفخر) تعرف سياحتك والله ، لقطته من ع الباب ..

محمود : نعم ؟

صادق : اصله كان حيتوه ويخش المكتب اللي فوقنا !

محمود : كده ؟

صادق : امال يا فندم .. انا صاحى كوينس .

محمود : (بهدوء) طيب تقدر تعتبر نفسك فى اجازة م النهارده .

صادق : (بعدم فهم) اجازة ؟ ليه يا فندم ؟

محمود : لحد ما تلاقى شغل فى مكتب تانى .

صادق : لكن ..

محمود : (بحسم) أرجوك .

صادق : امرك يا استاذ .. بس ودينى انا كان قصدى اخذكم ..

(يخرج صادق .. محمود يتحرك للرجل) .

محمود : حضرتك عايز الأستاذ محمد ؟

الرجل : (ناهضا) ايوه .. هو ..

محمود : هو فى المكتب اللي فوقنا يظهر حصل سوء فهم .

الرجل : انا .. انا آسف ..

محمود : احنا اللي آسفين ..

(الرجل يخرج) .

(محمود يجلس الى المكتب ويضع رأسه بين

كفيه) .

(الرجل يظهر عائدا ويقف لحظة مترددا) .

الرجل : (يفتعل السعال) لا مؤاخذه .

محمود : (يرفع رأسه ويبرأه) ايوه ؟

الرجل : الشاى .. ولا مؤاخذه .

محمود : (يبدو عليه عدم الفهم) ..

الرجل : قصدى حق الشاى ، اللي جابهولى حضرة الباشكاتب

محمود : (يتأمله باستغراب) مكانش فيه داعى ..

الرجل : (مقاطعا بلهجة الخنزير) انا والله قلت له كده هو اللي

صمم يشربنى .

محمود : مكانش فيه داعى تتعب نفسك .

الرجل : بس انا لازم ادفع حقه .

محمود : مش لازم ولا حاجه .

الرجل : لا .. لا .. لازم مايصحش (يبحث فى جيبه عن نقود) .

محمود : يا استاذ ..

الرجل : انا معايا .. معايا ..

(النقود تسقط منه على الأرض لارتبساكه .

ينحنى ويجمعها وهو ينظر لمحمود) .

هو حق الشاى كام ؟

محمود : (لا ينفق) .

الرجل : شلن اظن ، مش كده ؟ فى القهوه بشلن .. اتفضل ..
متأخنيش .

(يضع النقود على المكتب بجرح) .

محمود : (يضغط على اسنانه) .

الرجل : سلامو عليكم .

(محمود لا يرد .. الرجل يتسكك فى الخروج

ثم يستدير) .

الرجل : انا بقول ، ما دام جيت هنا ، وحضرتك محامى برضه ،
ما انا اقول لحضرتك ع الموضوع و ...

محمود : آسف .

الرجل : مامو انا مكنتش جاى للأستاذ محمد مخصوص .. انا

جاى له ع السمعه .. وما دام حضرتك شريكه ..

محمود : شريكه ؟

الرجل : طب اسمع الموضوع وبعدين ..

(يصدر من الصندوق صوت مواء قطة) .

محمود : (ينظر للصندوق بدهشة) ايه ده ؟

الرجل : ماهو ده الموضوع (مشيرا للصندوق) بوسى .

محمود : بوسى ؟؟

الرجل : ايوه .. تصو .. تصور حضرتك ضربوها .

محمود : ايه ؟

(الرجل يصير له وجه طفل ويفشل فى تمالك

أغصابه) .

الرجل : ضربوها ، وخربشوها كمان .. مع انها ما عملتش اى

حاجة ، عمرها ما آتت حد ، كانت بتشرب اللبن جنب

الباب وبعدين .. جم من وراها وراحوا رافسينها

بالتلوت .

(يتهدج صوته وتلاحق أنفاسه) .

دى حامل يا استاذ .. حامل ومالهاش حد غيرى ، قبل

كده ضربوا مشمشه لحد ما ماتت ، كانوا متغاضين منها ،

أنا دفنتها بايدي عند شريط السكة الحديد .. رحت

القبسم اشتكيت ما عملوش حاجة ، ناس قالوا لى اوكل

مهامى .. ما أنا بقول .. يعنى .. لو .. حضرتك ،

يعنى ممكن .. تتر .. تترافع ، دى حيوان ابكم

ما تعرفش تدافع عن نفسها و ..

(ثم يسكت ويرتجف) .

محمود : (محاولا أن يكون هادئا) أنا آسف ، مش ح اقدر افيدك

بحاجة .

الرجل : دول قالو لى ممكن اكسب القضية .

محمود : (لا يجد ما يقوله .. يهز كتفيه) .

الرجل : هى مش روح ؟

محمود : ايوه ..

الرجل : طب ليه بقى ؟

محمود : علشان علشان ما بحبش القلط ..

(الرجل يحتضن الصندوق بقوة .. يفشل فى
النطق .. يتراجع بظهوره بفزع خارجا ..
محمود يظل احظه هسمرًا ينظر الى حيث خرج
الرجل وهو مذهول ، ينفخ فى ملل ، يمشى
للمكتبه .. يتناول كتابا ثم يعيده دون أن
يفتحه .. يجلس بارهاق .. نبيله تدخل
بنشاط) .

نبيلة : صباح الخير يا محمود (ثم تغلق باب المكتب) .

محمود : اهلا نبيلة .

نبيلة : (تقبله على وجنته بسرعة) ليه اخبار القضية ؟

محمود : اتاجلت .

نبيلة : تانى ؟ وناوى على ايه ؟

محمود : وايه اللى فى ايدى عمله ؟

نبيلة : على رايك .. بس المهم ما تزعلش نفسك .

محمود : لا ماتخافيش ، بدأت اتعود .

نبيلة : وازاي حال المكتب ؟

محمود : بفكر اعمله بوفيه وأبيع قهوه وشاي .

نبيلة : أنا بتكلم جد .

محمود : يبقى عندك نفس المشكله اللي عندى .

نبيلة : أنا قلت لك انك حنتعب فى الأول ، ومحمد قالك نفس الحكاية .

محمود : (ينظر لها ولا يتكلم ينهض ببطء)

نبيلة : المكتب لسه جديد والناس ما عرفتهوش كفايه ..

وما تنساش ان الحقه مليانه محامين .

محمود : نعملا ، معاكى حق .. وفيه سبب كمان .

نبيلة : ايه هو ؟

محمود : الياافطه مش بالنليون .

نبيلة : (بشك) انت بتهز ولا ؟

محمود : لا حقيقى ، تخيلى يافطه بالنليون ملونه احمر واخضر ،

تولع وتطفى ، اسمى يولع بالأحمر وكلمة محامى بالأخضر

محمود عبد المجيد .. محامى .. محمود عبد المجيد ..

محامى .. وهكذا .

نبيلة : بلاش تهريج .

محمود : ياريت .. حتى التهريج محتاج شجاعه ، تصورى

موقفى لو لبست طرطور واتشغلبت .. وبعدين الناس

ما ضحككتش .

نبيله : ده مستقبلك يا محمود .. لازم تواجه الواقع وتحاول
تعرف ايه السبب الحقيقى .

محمود : (مقاطعا) عندك فكره اللي بيحاولوا يعرفوا السبب
الحقيقى .. بيحصل لهم ايه ؟

نبيله : لا .. اعرف اللي بيدياسوا بيعملوا فى نفسهم ايه .

محمود : ومين قال انى مستسلم ؟ (بمرح مفاجئ) تلب بسلاتش
اليافطه النيون .. ايه رأيك فى برواز فى صنف
الاعلانات المبوية ؟ .. فرصة مدمشة محامى يطلد
زباين للدفاع عنهم .. اسعارنا لا تقبل المناقسة ، نقب
كل القضايا .. شرفونا تجدوا ..
(طرق ع الباب .. محمود يسكت .. البساط
يفتح وتظهر رأس محمد) .

محمود : تعال يا محمد .

محمد : الله .. دى بلبل هنا .. ازيك يا بنت عمى .. ومالا
مكشركه كده ؟ لازم الواد محمود مزعلك .

نبيله : (متصنعة الابتسام) وهو يقدر يزعلنى ؟

محمد : لا يقدر ، انا عارفه جلياط .. قوليلي بس وانا اتطم
رقبته .. ايه الحكايه يا سى محمود ؟

محمود : ابدا .. كنا بنناقش اسباب فشلى .

محمد : ودى عاوزه مناقشه ؟ شوفى .. الناس نوعين .. فز
ربنا ناحسه .. ونوع جايب النحس لنفسه وجوز
م النوع ده ..

(التليفون يدق .. محمود يرد) .

محمود : الو .. أهلا .. أيوه درست القضية كويس .. نيس
أسفًا ، يظهر اني مضطر اعتذر عنها .

محمد : (لنبيه) مش بقولك .

محمود : (مواصلا) لا ممكن تكسبها انما بلاش تصالني ليه ؟
المهم اني مش حقد اترافع فيها .. أفندم ؟ (ينظر
في السماعه) الو .. (يلتفت لهما مبتسما) بيقولى
أحسن ! (يضع السماعه) .

محمد : قضية ايه دى ؟

محمود : تاجر حشيش موكلنى عن اثنين من صديانه ، شابين
متعلمين بيوزعوا له المخدرات عشان يكملوا في الجامعة .

محمد : ورفضتها ليه ؟

محمود : الحقيقة كنت متعاطف معااهم .. بس خفت الاتي نفسى
محول الاتهام ع التاجر باعتباره الفاعل الاصلى .

محمد : ده اللي حيدفع تكاليف القضية ؟؟

محمود : (يهز راسه) .

محمد : ده انت بقيت غاوي .. يعنى اللي يوكك في قضية يبقى
أمله داعيين عليه .

نبيه : امو ده السبب .. لو مترفضش كل القضايا اللي
بتجيك .

محمود : يحصل ايه ؟ اتغنى ويبقى عندى فيلا وعربية ؟

محمد : بالناسبه انا ح اشتري عريه جديده .

نبيه : لا بس عشان الشغل مش كتير يبقى لازم ..

(محمود ينظر لها ، نبيلة تعدل جملتها) .

نبيلة : ع الأقل في الأول بس لحد ما ..

محمد : بلبل معاها حق .. الموضوع مش قضيه ولا اتنين ..
أنا ساعات الشغل يكبس واضطر أعتذر عن قضايا كتير ..
خصوصا اللي ما فيهاش أمل .. انما تصبرماتك دي
حتعملك سمعه مش كويسه .. الانسان بيحتاج حد
يدافع عنه ، مش حد يحقق معاه ويحاسبه ويحكم عليه .
محمود : الزبون دايما على حق ؟

محمد : مش تصدى .

نبيلة : (متدخله) اسمع يا محمود .. بلاش عشان اكمل
العيش .. عشان الشغل نمنسه .. كفايه أنا باخد ماهيه
عشان أترمي كل يوم سبع ساعات في المصلحة من غير
لازمه .. الولد من غير شغل يبقى ضايع .. مالوش
قيمه ..
محمد : مغلوب .

محمود : المهم نوع الشغل .. لو اشتغلت ليل نهار مش حقد
أشيل أكثر من اللي بيشياه أي حدار في لاسكه .

محمد : افهم يا بنى آدم .. ما فيش دنيا تانيه غير اللي عايشين
فيها .

محمود : من الناحيه دي اطمئن .. أنا مبفكرش أغير الكون .

محمد : وليه يا شيخ ؟ ما تفكر ..

محمود : الدنيا فيها آلاف المجرمين واللصوص ، وابقى كداب لو
قلت لنى بحاربهم وفيها ملايين المغفلين اللي بينضحك

عليهم وأبقى مدعى لو قلت انى بحرك صباع واحد
عشانهم ، انما مقدرش أكون السبب فى زيادتهم ..
صحيح تاجر المخدرات ده حيا لاقى ميت محامى غيرى
يتبنوا قضيته ويستميئوا فى الدفاع عنها ..

محمد : (مقاطعا) زى أنا مثلا ..

محمود : أنا مقصدتكش ..

محمد : انت بتبالغ يا محمود. ياخويا .. صدقنى .

محمود : (بضيق) لأ مش صحيح انى ببالح .. انما يمكن بقول
كلام .. كلام مضحك بقول تليفزيونات قديمة وسخيفه ..
لكن لو سبنا كل اللى ممكن يتقال .. لو الواحد اتعامل
باحساسه بس .. حيوصل لنفس النتيجة .. وللأسف
الاحساس ده صعب انى أشرحه ... عشان تفهميه
يا نبيله لازم تعيشيه ، لو انتى شفتى التاجر ده بهدومه
اللى بتلمع ، لو شميتى ريحة البارفان اللى حاططها
واتفاجأتى بالسنة الذهب اول ما فتح بقه .. لو شفتى
الطريقه اللى بيطلع بيها المحفظة ويخرج منها الفلوس ..
لو شفتى الخواتم اللى ماله صوابه .. صوابه نفسها
فيها حاجه تستنفزك ، ورقبته ولفده وقفاه وابتنسامة
لو كنتى انتى اللى بيجاسول يكلمك بمنتهى الأدب
والاحترام وفى نفس الوقت ييجسبك انك مش ند له
وانك محتاجه لفلوسه .. لو سمعتيه وهو بيخطف بالدين
الحنيف والمصحف الشريف ، لو ...

نبيله : كفايه يا محمود ، أنا فاهمه اللى عاوز تقوله .. اعمل
اللى يعجبك ..

(لحظة صمت)

محمد : كل ده كويس .. بس انا رايبى ..

محمود : انا رايبى انك تدينى خمسة جنيه سلف .. ممكن ؟؟

محمد : بس ؟ طلب ما تاخذ اكثر .

محمود : لا .. يدوب .. اصل عايز اعزمكم ع السينما .. انت فاضى بعد الضهر ؟

محمد : لا طبعا .. عندى شغل .

نبيله : سينما ايه يا محمود .. والمكتب ؟

محمود : فيلم «كاوبوى» شفت اعلانه وانا رايح المحكمة الصبح ..
ما بتحبوش الكاوبوى ؟ طاخ طوخ طاخ .. القتل
والدم للركب بس من غير قضايا ودوشة دماغ .

محمد : اتفضل (يناولہ النقود ثم لنبيه) مش بقولك جوزك
ده تحفه .

محمد : شوف انا كنت ح انسى انا جاى لك ليه .. اصل وانا
طالع لقيت الباشكاتب بتاعك قاعد ع السلم مستنينى ..

محمود : (بقرف) راجل لزج .

محمد : اشتكى لى منك ووسطنى اترجاك ترجمه .

نبيله : هو انت رفته ؟

محمود : وافرضى .. هو مش من حقى كصاحب عمل انى افصل
الموظفين بتوعى فصل تعسفى ؟؟

نبيله : حرام عليك .. ده راجل كبير وغلبان ..

محمد : هو عمل حاجه ؟

محمود : (يضحك) .

محمد : ايه اللي بيضحك ؟

محمود : أنا اخليه هو اللي يقولك بنفسه . . انت بتقول قاعد
ع السلام ؟

محمد : أيوه .

محمود : لحظه واحده . .

(محمود يخرج) .

غبييله : (منفجره) أنا غلبت معاه يا محمد . . مش عارفه أعمله
ايه ؟

محمد : ولا أنا . . المشكله فيه هو . . تايب روحه من غير
سبب . . عمره ما خد الحياه ببساطه .

غبييله : ما بيرضاش يقولى على حاجه . . لكن أنا متأكده انه
من جوه بياكل فى نفسه .

محمد : وانتوا اخباركم ايه ؟ مش ناويين بقى ؟

غبييله : (مرتبكه) أنا ما بفكرش فى الموضوع ده دلوقتى .

محمد : انتى ولا هو اللي لسه ما بفكرش . .

غبييله : أنا كل اللي يهمنى فى الأول مستقبله . .

محمد : ما هو لازم تفكرى فى الجواز عشان مستقبله برضه . .
الجواز حيخليه يستقر ويحس بالمسئوليه .

غبييله : (تسكت) .

محمد : ثم بينى وبينك ما دام بيحبك ، مفروض بيض
لستقبلك . . الوقت ببسرقك . . ومامتك ابتدت تقلق
من ساعة ما رفضتى المريس الأخرانى .

نبيله : اديك شايف ظروفه .

محمد : وعمرها ما جئتغير ، ده فقري ، ما تحاولي انتي
تساعديه . . . اهو عقد العمل بتاع دبی جاهز ، بس انتي
تقرري . . . فرصه تعملي لك قرشين حلوين وتجهزوا
شقه كويسه .

نبيله : محمود مش موافق . . ما انت عارف . . وکمان انا . .
(ثم تسکت عندهما تری محمود داخلا) .

محمود : (ينظر لهما بریبة) مالمقتوش بره .

محمد : طب ما تقولى انت .

محمود : اقوالك ع العموم هي حاجه ما تضحكش قوي . . الحكايه
انه بيحاول يسرق الزباين من مكتبك .

محمد : (ضاحكا بشده) مش معقول .

نبيله : (غاضبه) ده يبقی راجل مش كويس فعلا .

محمد : معلش ، سامحه المره دی .

نبيله : لا . . دی حاجه مايصحش الواحد يسامح نيهها . .

محمد : لا وجاهي يوسطني انا بالذات . . يخرب عقله (يعود
للضحك) بالذمه راجل دمه خفيف . . ديمعمل ايه ؟ وراه
عيله والعيشه صعبه . . ده حتى قادلني دن يرومين وقالی
انه مرفوع عليه قضيه طرد من شقته . . مالمكش
علیها ؟

محمود : لا ..

محمود : غریبه .

محمود : مش غریبه ابدًا ، المفروض انه اول واحد يقدر يعرف
انى محامى فاشل .

محمود : المهم تسامحه المره دى ، ما تخلينش احس انه اتعرف
بسببى ، احسن بعين آخده عندى واسسلطه يخطف
زباينك .

نبيهه : و كان بيخططهم ازاي ؟

محمود : بي فهمهم اننا شركا فى مكتب واحد .

محمود : معقول .. (وبعد لحظة صمت) صحيح والله .. الفكره
دى تاهت عننا ازاي ؟

محمود : فكرة ايه ؟

محمود : للشركه .. ما احنا فيها .. قلت ايه ؟ .. ايه رايك
يا بلبل ؟

نبيهه : دى مساله بتاعتكوا انقوا ..

محمود : ايه رايك يا محمود .. يعنى سكت .. اظن دى مس
عايزه تفكير ..

محمود : (بتفكير) وانتا حستفيد ايه ؟

محمود : (وقد بدأ يتحمس الآن فقط) انت بتتكلم ازاي .. اصلك
خايب ..

محمود : (مقاطعا) ماهو عشان كده مش ح خفيك بحاجه ..

محمد : افهمنى .. الكتب بقى يستعبدنى .. ما بقوقش
م الشغل .. ادبك لسه شاييف .. حتى السيئمة
ما بروحهاش .. لكن لما نبقى سوا حشيل على الحمل .

محمود : اجل الموضوع ده لبعدين .

محمد : وناجله ليه ، ما تقولى يا نبيله .

نبيله : (بتردد) ليه لا يا محمود .

محمد : طاو عنى ، انا شاييف المستقبل قدامى .. نوفر ايجاز
مكتبك ، وانضى لك اوضه عندى تقعد فيها لحد مايبقى
لنا مكتب كبير .. انت حتتجوز على طول وجايز
اعملها انا زاهر وآخد شقه جنبكم ، وحتبقى العيشه
آخر لذه .. انا اراهن بمليون جنيهه على اللى بقوله .

محمود : كله دش صحيح .. انا مش حشيل عنك حاجه .

بالعكس حبقى عبء عليك .

محمد : وليه تحكم بالفشل م الاول .

محمود : ما تنساش ان كل واحد له طريقته .. بصراحه انا
مقدرش اشتغل بطريقتك .

محمد : يا سيدى كل حاجه لها حل ، القضايا اللى ما تحبش
تقراخ فيها سيبها لى انا .. بس وافق .

محمود : (لا ينطق) .

محمد : بلاش ترفض يا محمود ، ختصدم فيك ، خليكى شامده
عليه يا نبيله .

محمود : (لا ينطق) .

محمد : (بضيق وارتيباك) ما فيش فايده ، يظهر انك استطيعت
الكسل ، واقف مطرحك وعمال تلفت وتدور حوالين نفسك ،
عايز ايه .. مش فاهم .. هو احنا يا اخي مش بنى
آمين زيك برضه ولا ايه ؟

محمود : معلش ، سبنى افكر .

محمد : انا اوعى عليك وانت بتفكر ، عمر التفكير ما خلاك
غيرت رايك .

محمود : (ناظرا فى عينيه) وعشان انت عارف كده مكانش فيه
داعى للفكره دى بالمره

محمد : انت زعلت ولا ايه ؟

محمود : لا .. بس مش عايزك تتصدم فى

محمد : (متكلفا المرح) وانت برضه صدقت .. انا كنت
بهوشك بس .

(ثم تمر لحظة ضمت ثقيله ومتوتره)

محمد : طيب .. اسيبكوا بقى .

محمود : خليك قاعد .. انا غاضى .

محمد : معلش انا غدى شغل .

محمد : سلام يا بلبل .. ما تنسيش تسلمى لى ع الللى فى
البيت .. آه بالحق يا محمود القضية اخبارها ايه ؟

ثيابه : (بحزن) اتأجلت .

محمد : تانى ؟ ولو انى قلت معلش ميت مره ، لكن .. برضه
معلش ، سلام .

محمود : سلام ..

(يخرج محمد)

(محمود ونبيله لا يتحركان .. ينظران لبعضهما

.. لحظة صفت)

نبيله : انا ما كنتش متصوره ان محمد بيحبك للدرجة دي *

محمود : (لا يرد) ..

نبيله : بس تعرف انك كنت سخيّف معاه ..

محمود : (لا يرد) *

نبيله : اصله مد لك ايده وانت رفضتها *

محمود : (بهدوء ظاهري) من فوق يا نبيله .. مدها من فوق *

نبيله : يعني ايه ؟

محمود : انا مطلبتش منه حاجه .. واللى عمله ده عيب .. عيب

قوى ، انا ما وصلتش لدرجة انه يعطفّ على *

نبيله : وليه بتسميها كده ؟

محمود : لأنها كده *

نبيله : مكانش اتضايق لما رفضت .. انت ما شفتش كان

مرتبك ازاي ؟

محمود : جربي تدى حسنه لشحات وشوفى يكون شعورك ايه

لما يرفض .. لما يحرمك من لذة الاحساس بالتفوق *

نبيله : وما دام هو اللي انكسفت ، رَعلَاق ليه ؟

محمود : ما حسرش كثير ، ع الأقل بان قدامك شهم وبيحاول
ينفذنى ولو على حساب نفسه .. حيفضيلى اوضه
فى مكتبه آل ، فاهم روحه عبقرى .. انا لو كنت عايز
كنت بقيت احسن منه .. عشرين مره ، الشغل اللى
بيعمله يقوم بيه حقه باشكاتب محامى بصباح رجله ..
نبيله : انت كل حاجه تكبرها وتبالغ فيها .

محمود : نبيله .. ده مش كلامك .. فى الأول ما كنتيش عايزانى
أخد مكتب قصاص مكتبه ، ودلوقتى موافقه انه يحسن
على ويشغلنى عنده .
نبيله : انا ما بقيتش اعرف اتكلم معاك .. الحق على انى
تاعبه روحى علشانك .

محمود : انتى كمان عايزه تلعبى معايا دور المنقذ ؟

نبيله : ما تقولش كده يا محمود .

محمود : ايوه انا فاشل (ومضحك) وبلف حوالين نفسى زى
مابيقول ، انا كده .. ودى حياتى .. وماالسمحش
لاى حد

نبيله : (مقاطعة) انا مش اى حد يا محمود .

محمود : (يسكت لحظه) ثم انتى ايه اللى جابك دلوقتى ..
احنا ميعادنا كان بالليل .

نبيله : انا غلطت فعلا عشان جيت اطمئن عليك .. انسفه ..
مش ح اعمل كده تانى .. معلى ..
(تاخذ حقيبتها بمصبيه وتتحرك خارجة) ..

محمود : نبيله ..
(تتوقف عند الباب .. ينظر نحوها ويهم
بالكلام .. ثم يسكت) ..

نبيله : (تستدير له) نعم ؟

محمود : (ينظر في الأرض) .

(نبيله تقترب منه بيضاء تترك حقيبتها على

مقعد ، تقف خلفه وتضع يدها برفق على

كتفه) .

نبيله : مالك يا محمود ؟

محمود : (يغمض عينيه) كل شيء ركيك .. سخيف .

نبيله : بلاش التشاؤم ده .

محمود : أنتى بتقولى كلام مجانى

نبيله : (تسحب يدها) وبلاش تهزانى كل شويه .

محمود : (مواصلا جملته) ما بتدفعيش فيه حاجة .

نبيله : (بضيق) بطل مثاليه بقى .

محمود : هى بقت شتيمه ؟

نبيله : انت مثالى زياده عن اللزوم .

محمود : زياده قد ايه ؟ .. كام سنتى ؟

نبيله : (باكية فجأة) محمود .. انت مبتحبينيش ..

(محمود يسكت يمد يده ليمسح على شعرها) .

نبيله : (مبتعدة عنه) أنا ح أريحك منى .

محمود : (يمسك بذراعها) أرتاح لو عرفت بتحبينى ليه ؟ ليه

يا نبيله ؟ ليه خبتينى أنا وماحبيتيش محمد ؟ ليه ؟

نبيله : لأنى بحبك أنت يا محمود .

محمود : جاوبيني على سؤالى .. ليه ؟

نبيله : معرفش ليه .. بحبك .. وعاوزاك زى ما انت ..

محمود : لا يا نبيله .. لازم يكون فيه سبب ولازم تعرفيه ..

والا يبقى حبك ما لو شئ اى قيمه .. تبقى عواطفك كلها

ما تقدرش تنقضى ..

نبيله : كفايه انى بحبك وخلص .. لكن انت ..

محمود : (يترك ذراعها) ..

نبيله : (مواصلة) انت عمرك ما قلت لى كلمه واحده .. وانا

حلوقتى اللى عايزه اعرف .. انت بتحبنى ولا لا .. ؟

محمود : (يسكت) ..

نبيله : سكت ليه ؟ اتكلم يا محمود .. انت مابتجيبش ؟

انا اللى بيتهميا لى انك بتجبنى ؟ قول حاجه .. قول

ايوه ولا لا ..

محمود : (يبذل مجهودا ليتكلم) انا .. انا ..

(نبيله تنتظر له بفزع ، ثم تخطف حقيبتها

وتنطلق خارجه .. محمود يجرى خلفها) ..

محمود : نبيله .. نبيله ..

(يدخل صادق فيتوقف محمود عن الاندفاع) ..

صادق : لا مؤاخذه انا يظهر جيت فى وقت ..

محمود : عايز ليه ؟

صادق : جاي اتأسف لحضرتك .. سامحنى المره دى .. والنعمه

الشريفه كان قصدى اخدمك .. مش ح اعلم الغلطه دى

تأني ..

محمود : طيب .. طيب ..

(محمود يتحرك فى اتجاه الباب .. صادق يلاحقه بالحاح) ..

صادق : متشكر .. ده جميل عمرى ما انساه .. والله حضيرتك امير وتستاهل كل خير انت اكبر قلب رحيم شفقه فى حياتى ، ايدك ابوسها .

محمود : (مشيرا له بغضب) بره .

صادق : الله .. الله .. انا زعلت سعادتك دلوقت ؟ ده انا خدامك يا متر .

محمود : قلت بره .

صادق : طب ما تزعلش منى .. انا اصلى غبى وما بفهمش .. حلفتك بالعالى ، عشان خاطر النبى ..

(ثم يَخطف يده غنوة ويقبلها)

محمود : بره .. بره .. بره ..

« ستار الفصل الأول »

الفصل الثانى

المشهد الأول

- بعد مرور شهر •
- نفس المنظر •
- محمود جالس خلف المكتب •
- امامه تجلس فتحه • فى العشرين تقريبا ••
- ترتدى ملابس رخيصه وئمسك دوسيه فى
- يدها حركاتها تدل على بعض الخفه ••
- تتمخض فى منديل وهى تبكى •
- صادق يدخل بصينييه عليها كوب شاي •

محمود : وبعدين ؟ مالوش فايده العياط .. امسحي دموعك ..

• (صادق يتقدم منها بصينية الشاي) •

صادق : انتفضلى •

فتحيه : يزيد فضلك يا عم صادق •

صادق : العفو •

(صادق يتراجع ناحية الباب ومعه الصينية

الفارغة) •

محمود : يعنى ائهم من كلامك .. انك رفعتى قضية فعلا ؟

فتحيه : ايوه يا استاذ .. وآدى الورق .. فيه كل حاجة .. اصل

المحامى اللي كان ماسكها لى .. قفل مكتبه •

محمود : ليه ؟

فتحيه : سافر يشتغل فى ابو ظبى •

محمود : آه ..

(محمود يتناول منها الملف ويفتحه .. ثم يلاحظ

ان صادق يتلکأ فى الخروج) •

محمود : عايز حاجة يا عم صادق ؟

صادق : لا .. سلامتك يا متر ..

(صادق يحدج فتحيه بنظرة غامضة ثم يخرج

محمود يواصل القراءة فى الملف ثم يتركه) •

فتحيه : عرفت بقى انى ضحيه يا استاذ ؟

محمود : المهم .. لما رحى عنده البيت ، كنتى عارفه قاصسده

ولا لا ؟

فتحيه : ابدًا وشرفك .. قالولى فيه تصوير .

محمود : مين اللى قالك ؟

فتحيه : عبده .. الريحيسير .. وهو اللى خدنى الفيلا بنفسه .

محمود : طيب .. رحى .. ولقيتى ان ما فيش تصوير ..

فتحيه : قالى ان اللبىه المنتج حيمملك امتحان .. صدقتهم ..

وبعدين جابوا كاميرا وقعدوا يصورونى .. اتحركى ..

اقتدى .. نامى .. اقفى .. وبعدين .. (تسكت)

محمود : وبعدين ايه ؟

فتحيه : قالى اقلنى !

محمود : كده ؟

فتحيه : ده اللى حصل وحياة المصحف .

محمود : وعملتى ايه ؟

فتحيه : اتكسفت ومارضيتش طبعا .. انا مش وش كده .

محمود : كويس .

فتحيه : بص لعبده وقاله ما تنفعلش ، اترجيته وقلت له انا عايزه .

أمثل بس بشرفى ، قام ضحك وقالى ... شتيمه

أبيحه !

محمود : ده الريحيسير طبعا ..

فتحيه : لأ المنتج .. مؤاد بيه قالى ياوسخة يا ...

محمود : (مقاطعاً) طيب ، طيب ، اعتدى عليكى ازاي ؟

فتحيه : بالعافيه ، زى ما حكيت لحضرتك .

محمود : فيه شهود ؟

فتحيه : ايوه ، مكتوب عندك فى الورق (ثم تبكى) .

محمود : طب هدى نفسك ، أشربى الشاي .. والقضيه حصل فيها ايه ؟

فتحيه : المجامى بتاعى فى اول جلسه طلب التاجيل .

محمود : عشان ؟؟

فتحيه : والنبى ما انا عارفه ، مع انه حد كل اللى حيلتى ، ولما جه يقفل المكتب ، قالى احسن لك تروحي لمحامى فؤاد بيه وتحليها معا ودى .. ما كدبتش خبر ، وجيت له ..

محمود : جيتى له مين ؟

فتحيه : (مرتبكه) قصدى رحى له .. وقلت له اتنازل لكم عن اللقضيّه وتدورنى تعويض .. مرضيش ، وقالى احنا اللى حنرفع عليكى دعوه اسمها ايه دى .. رد شرف ونسجفك كمان .. قال صحيح يا استاذ يقدروا يسجنونى ؟

محمود : لا .. ما تخافيش .

فتحيه : الحمد لله .. اهو انا سألت ولاد الحلال على محامى يكون غلبان وعلى قدى ، دلوتنى على حضرتك .

محمود : اشكرك .

فتحيه : يوه ، يقطع لسانى ، مش قصدى والنبى ، انا بدى اتقول يعنى

محمود : مش مهم •

فتحيه : والله انت باين عليك طيب وشهم ، ربنا ينصبرنى على
ايديك •

(محمود يتحرك خلف المكتب ويقف مستندا الى
حافته مواجهها فتحيه) •

محمود : طيب ، انا خ اروح المحكمة واطلع على ملف القضية • • ،
وتفتوى على بعد يومين تلاته ، ومعاكى الشهود •

فتحيه : حاضر •

محمود : بس اهم من ده كله حاجه واحده •

فتحيه : الأتعاب • • فاهمه •

محمود : لا ، تجاوبينى بصراحة ، كل اللى قاتلولى ده مطبوظ
ولا • • ؟

فتحيه : (تقف منفعله) والقرآن المجيد يا استاذ •

محمود : (يجلسها برفق) مش عايزك تحلفى • • المفروض انك
ما تخيبيش على عثمان اقدر اساعوك •

فتحيه : انا صريحه وحياة ربنا • • اصلك ما تعرفش فؤاد بيه • •
ده وحش ، مش بنى آدم •

محمود : وايه اللى عرفك بيه ؟

فتحيه : كانوا عاملين مسابقة للوجوه الجديد • • قدمت نفسى ،
وهو كان بيמתحنا • •

محمود : مش كان احسن لك تدورى على شغله تانيه •

فتحيه : ما انا طول عمرى فى الشقا ، من يوم ما ابويا قعد م الشغل ،
واخواتى بقم فى رقبتي وانا بشتغل •

محمود : فين ؟

فتحيه : حاجات كتير .. شويه عند ترزى ، وشويه فى مصنع تريكو ، واشتغلت فى محل قماش ، ومحل كوافير .

محمود : وليه سبقتى الشغلانات دى كلها ؟

فتحيه : ارزاق .

محمود : على كده ما كنش فيه حد قبل فؤاد بيه .

فتحيه : انا طول عمرى ماشيه بشرفى .

محمود : مفهوم .. لكن ده يمكن يكون مهم فى القضية .. متأكد .
ان فؤاد بيه .. اول واحد ؟

فتحيه : (بقلق) اول واحد ايه ؟

محمود : يعنى ما حدش حاول معاكى قبل كده . ؟

فتحيه : (بعد تردد) طبعا .. حصل .

محمود : الترزى اللى اشتغلتى عنده مثلا ؟

فتحيه : (تهز رأسها ايجابيا ثم بعد لحظه) وصاحب المحل .

محمود : محل القماش ؟

فتحيه : والكوافير ..

محمود : يعنى كلهم باختصار

فتحيه : (واقفة بانفعال) انما فضلت بنت بنوت يا استاذ .

محمود : مش ده المهم ؟

فتحيه : لا مهم .. انا صحيح جعت كثير وانضربت واتهنت م اللي
يسوى ، واللى ما يسواش ، لكن حافظت على شرفى ..
لو كنت عايزه ، كنت عملت زى غيرى ، لكن انا خسرته ..
دالمسه آخرها امبارح ، واحد عربى قالى اديكى ميت جنيه ،
مرضتش *

محمود : ودا شوفتية فين ؟

فتحيه : فى الشارع ، مشى ورايا بالعربيه وبعدين نزل وحاول
يشدنى يركبنى بالعافيه ، كنت حقلع الجزمه واضربه
بيها *

محمود : وايه اللي حاشك ؟

فتحيه : اصل كان فيه امين شرطه واقف .. خفت الرجل يتبلى
عليا ويقول انى سرقتة ويجرجرونى ع القسم ..
(محمود يسكت .. الصمت يطول) *

فتحيه : امشى انا بقى ؟

محمود : آه .. بس امضى لى انك وكلتينى عنك .. هنا ..
(يقدم لها ورقة وقلم ، توقع اسمها ببطة) *

محمود : انتى بتمضى كده من غير ماتشوفى اللي مكتوب ..

فتحية : وايه فايده الشوف .. هو انا بعرف اقرا ..

محمود : تانى مره ما بتمضيش على ورقه غير لما حد يقرأها لك ..

فتحيه : ويعنى لو قروها ح افهم حاجه من كلامكو .. انا سايبها
أربنا يا استاذ .. عى اذنك *

محمود : مع السلامه ..

(تخرج فتحيه .. محمود يظل واقفا لحظة)

ثم يتمشى مفكرا ، يفتح الراديو على البرنامج
الموسيقى ، يعبث بفتاحة أوراق ذات نصسل
لامع .. يتصفح أوراق فتحه .. بينما تدخل
نبيله وتقف لحظة دون أن يراها وعندما يلحقها
تبدو عليه الدهشة .

محمود : نبيله ؟

نبيله : (تقترب منه ببطء) .

محمود : ازيك .

نبيله : كويسه .

١] قَمِ تَتَحَرِّكْ لِلرَّادِيُو وَتَقْلِقْهُ (.

نبيله : ايه اخبار القضية ؟

محمود : اتاجلت .

نبيله : ولا يهكم ، بكره تكسبها .

محمود : مش مهم نكسبها .. المهم ما تتأجلش أكثر من كده .

نبيله : ما دام الحكم ما صدرش .. يبقى إسه فيه أمل .

محمود : الأمل نفسه بقى حكم .

نبيله : وليه اللي فى ايدك دى .

محمود : فتاحة ورق .

نبيله : دى حامية قوى .. حاسب لحسن تجررك .

(تأخذ الفتاحة منه بهدوء وتضعها على المكتب .

محمود ينظر لها بنخب .. يأخذ يديها بين

يديه) .

محمود : أنا آسف يا نبيله .. أنا جرحتك .. من حقت تعرفني
ان كنت بحبك ولا لا .. كان لازم أقولك .. لكن ساعات
يبقى جوليا كلام كثير ولما أحاول أقوله ما اعرفش .

نبيله : يبقى خلاص .. ما تقولش .

محمود : يعنى مش زعلانه منى ؟

نبيله : ما هي دي الحكايه .. أنا ما بقدرش أزعل منك .. آخر
مره كنت هنا صممت أقطع علاقتي بيك .. ما نمتش
طول الليل م العياط .. جت على لحظة اتمنيت فيها
انتقم منك .. تانى يوم قررت انسأك .. عملت ترتيبى
أسافر اشتغل فى دى وأبعد عنك .. وفعلنا الشهر
اللى فات كله ما فكرتش فيك ولا دقيقه واحده ..
وانتهى لى انى نسيتك .

محمود : وبعدين ؟

نبيله : زى ما انت شايف .. نزلت أتمشى فى وسط البلد
واشتري حاجات السفر اتفرجت ع الفترينات ، وخذت
جيلاتى فى الأمريكين .. كنت حاسه بهدوء غريب ونفس
صافيه كانى عمرى ما قابلتك .. وفجاء لقيت روحى جايه
على هنا .. يمكن لو حبيت امنع نفسى كنت قدردت ..
ولكن ما حاولتش .. طلعت السلم كانى جايه لك
عادى .. زى كل يوم .

محمود : أنا يثبت انى ح شوفك تانى .. ولما لقيتك داخله
فرحت .

نبيله : مش باين عليك .

محمود : ما تزعليش منى ، انا عارف انى بتصرف تصرفات غريبه ومالهاش معنى لكن صدقيني فرجت .. فرحت قوى ، لدرجة ان قلبى كان بيدق ، جايز مكانش باين على عشان كنت مكسوف منك ، او يمكن ...
(ثم يسكت ويترك يديه تسقطان الى جانبه) .

محمود : وحشتيني يا نبيله .

نبيله : وانت يا محمود .

(يفرد ذراعيه فتندفع الى صدره) .

محمود : نبيله .. ما تبقيش تسيبيني .. انا محتاج لك .

نبيله : انت اللي حتسبني يا محمود .. مش انا .

محمود : مستحيل .

نبيله : يا سلام .

محمود : أيوه ، انا طول الوقت كنت خايف من نفسى .. خايف اهرب منك زى ما يهرب منها .. يمكن ده اللي يخلي كلمة الحب بتقف على لساني ، احساسى انى مقدرش اتحمل مسئولية الحب ده .

نبيله : ليه يا محمود .. حد يهرب من سعاده ؟

محمود : وايه هي السعاده يا نبيله ؟ تفكرى حبنا لوحده كفايه ؟ ده اللي دايما اساله لنفسى .. لكن لما غبتى عنى الايام اللي فاتت عرفت الجواب .. عرفت ان حبنا هو الضمان انى ما اسقطش .. انى ما انتهيش بدرى .. ممكن ألف حاجه تعذبني ، ممكن افشل فى شغلى وعلاقتى بالناس .. ممكن احتر نفسى .. لكن لما تكونى جنبى حشمتيني ..

أخط رأسي في صدرك وأنا م .. مهما حسيت بالكآبه أو
اليأس أو حتى العبث .. مش ح ابقى لوحدى .. عشان
كده بقولك ماتسيبينيش ، حتى لو ضايقتك شويه ..
لأنى ما ليش غيرك .. لأنى من غيرك كل الأشياء
بتستوى فى نظرى الأبيض بيبقى زى الأسود .

نبيله : (بتأثر) يا حبيبي .

(نبيله تضمه الى صدرها .. محمد يظهر داخلا
فجأة .. ثم يقف مره واحده) .

محمد : احم .. احم ..

(يشعران به .. نبيله تبتعد بسرعة عن
محمود) .

محمود : انت بتطلع امتى ؟

محمد : (داخلا) فى الوقت المناسب .. أزيك يا بلبل .. شفكت
وانتى طالعه قلت آجى اسلم عليكى .

نبيله : الله يسلمك .

محمد : تسمحوا لى اخبطكم عين .. ده اجنا بنتقدم قوى .

نبيله : (تبتسم بخجل) محمد .. وبعدين ؟

(محمود يضحك بسعاده ويتوسط خصرها
بذراعه) .

محمد : صحيح الدنيا حظوظ .. انا شخصيا مؤمن بمسالة
القسمه والنصيب .. مش بيقولوا سعيد فى الحب تعيس
فى الشغل ، والعكس صحيح .. ان القسمه كده
مافيهاش عدل .

محمود : ايه التخريف ده ؟

محمد : أنا بكلم روحى يا سيدى ، ما تزعش ، أصلكوا فتحسوا
نفسى للحب ، الا قولولى كان غين الغرام الملهب ده
من زمان ؟

محمود : يعنى ايه كان فين ؟ أنا طول عمرى بحب نبيله وواقع
فيها لشوشتى كمان .

محمد : يا سـيـديى .. لازم بقى كنت بدارى عشان خايف
م العوازل .

محمود : انت كلامك بقى بلدى قوى .

محمد : أنا طول عمرى راجل شعبيى .. المهم امتى حتفرح فيكم
باذن الله ؟

نبيله : (مغيرة موضوع الحديث) ايه يا محمد .. نازل فينا
أسئله كده ليه ؟

محمود : قريب على اى خال .. حتفرح دينا قريب قوى .. مش
كده يا بلبل ؟

نبيله : انت أدري .

محمد : كده من غير ما تاخذوا اذننى ؟ هو انا برضه مش ابن عمك
يا بت ولا ايه يعنى مفروض سياحتك تيجى تطلبها منى ،
وأنا أفكر الأول .. وبعدين أروح أتوسط لك عند عمى ..
(ثم يضحك فجأة ويقبل محمود بلا مبرر) مبروك ..
الف مبروك .

محمود : وبلبل ؟ مش حتبوسها ؟

محمد : قوى .. أنا بس مكسوف أبوسها قدامك .. تعالى ..
(يقبلها بصوت مرتفع فى ارتباك ومحمود

يتأمله) .

محمد : عارفه يا بلبل .. الواد ده حظه بمب .. انا بقولها في
وشه بصراحه انا بحبده .

نبيهه : (برقة) مرسى يا محمد .

محمد : (مقلدا لهجتها) مرسى يا محمد .. ايه يا خويا ده ..
البت بقت تنفط رقه كده ليه .. هو الحب بيعمل كده ؟

نبيهه : عقبالك .

محمد : وانا الاقى زيك فين ؟ (متذكراً فجأة) بالحق
يا محمود .. القضية حصل فيها ايه ؟ مش الجلسة كانت
اول امبارح ؟

محمود : اتاجلت .

محمد : عادى .. واخبار الشغل ايه .. لسه برضه قاعد
تهش القضايا .

محمود : انت اخبارك ايه ؟ بقالك كام يوم مش باين .

محمد : اصلى خلاص حا اعزل من جنبك .. خدت مكتب جديد
فى شارع قصر النيل .

نبيهه : وعرفت تاخذ شقه هناك ازى ؟ اكيد دفعت خلو
كبير .

محمد : لا والله مش قوى .. اصلها شقة واحد معرفه وزبون ..
فؤاد سامى طبعا سمعوا عنه ؟

محمود : فؤاد سامى ؟

محمد : منتج سينما مشهور .

محمود : بتقول زبونك ؟

محمد : ايوه .. ده انا ماسك له ختة قضيه تفتس م الضحك
واحده كومباريس بقتهمه انه

نبيله : ايوه افكرته .. شفته مره بيتكلم فى التليفزيون .. ده
دمه ثقيل قوى .

محمد : بالعكس بقى .. لو تعدتى معاه حتغيرى رايك ، هو
صحيح راجل هاييف ومنحل ، انما مسلى جدا .. غسل ..
(لحظة صمت)

محمد : طيب .. اسيبكوا بقى لحسن تقولوا على عزول .. ياي
يا بلبل شدى حيلك مع الجدرع ده عايزين نشوفه فى
القصص .. من بكره .. هه ؟

محمود : بقول ايه يا محمد .

محمد : قول .

محمود : ولا بلاش .. خليها بعيدين .. ما احنا حنتقابل .

محمد : طيب سلام .

محمود : سلام .

(يخرج محمد .. محمود يتمشى شاردة) .

نبيله : سرحت فى ايه ؟

محمود : هه ؟ فى الدنيا .. فيكى وفى وفى محمد .

نبيله : انت الكلام اللى قلته عننا ده صحيح ؟

محمود : وهو موضوع الجواز فيه هزار ؟

نبیله : اصلی آتھا لی ائک بتوجه له هو الکلام ؟

محمود : حسیت ائی فرحان بیکی وعایز اقول لکل الناس ائی بحیک .

نبیله : (بمداعبه) وبالذات محمد ؟

محمود : وبالذات محمد .. ولا تزعلی .

نبیله : محمد .. ما بقاش یحبنا .

محمود : فعلا .. ما بقاش یحبنا .

نبیله : هزاره فیه حاجه ما تریحش .

محمود : بالظبط .

نبیله : بقی حاجه ثانیه .

محمود : محمد طول عمره حاجه ثانیه .

نبیله : قلت کده م الاول ما صدقتنیش .

محمود : ما کنتش متصور یبقی حاجه ثانیه .. خالص .

نبیله : علی فکره تفتکر قصد ینقل مکتبه بعید عنک ولا دی صدفه ؟

محمود : ما فیش حاجه اسمها صدفه .. انما هی الحیاه کده .. الناس بتتقابل وتفترق .. ما فیش شیء بیفضل زی ما هو .. احنا بنسمی دی صدفه ، لکن هی ضروره .. لازم تحصل .

نبیله : مش فاهمه .. انت بتتکلم عن ایه ؟

محمود : عن الصفحه • تصورى تجينى النهارده قضيه ويطلع هو
الى ماسكها للخصم و ...
(ثم فجأة يشرق فى ذهنه خاطر ..)

محمود : صادق .. صادق ..

نبيسه : (بدهشه) فى ايه ؟
(يدخل صادق) ؟

صادق : افندم يا متر ..

محمود : انت تعرف البنات الللى كانت هنا من شويه ؟

صادق : اعرفها منين يا فندم ؟

محمود : قصدى مى جت المكتب لوخدما ولا انت ...

صادق : ودى فيها ايه بقى يا متر ؟ انا لقيتها نازله من مكتب
الأستاذ محمد والدمعه بتفر من عينيه .. وبتدور على
محامى ، ابقى اسمى خطفتها ؟

محمود : وليه ما قلتليش ؟

صادق : انا .. انا كان قصدى اخذك يا متر .. انت زعلت ؟

محمود : خلاص .. روح انت ..

صادق : (بفزع) اروح فىن ؟

محمود : شوف شغلك ..

(صادق يتنهد بارتياح ، ويخرج ..)

نبيسه : ايه حكاية البنات الللى بتسال عليها ..
(محمود يتحرك للمكتب ويمسك بأوراق فتحه)

وينظر فيها لحظه ثم يشرد ببصره ناسيا
نبيله (.

نبيله : محمود .. محمود ..

محمود : (يلتفت لها مفينا) ايوه .

نبيله : انت سرحت في ايه تاني ؟؟

(اظلام)

المشهد الثانى

- بعد مرور عشرة أيام •
- نفس المنظور •
- محمود واقف امام دولا ب الأوراق يقرأ فى
بعض الملفات •
- صائق يفتح باب الغرفة ويفتح الطريق
لحمده •

محمد : سعيده يا محمود .

محمود : (يلتفت) اهلا يا محمد .. اقمع (ثم يعود لقراءة الملف) .

محمد : انت مشغول ؟

محمود : لا .. مش قوى .. حقيقته واحده .

محمد : يعنى ممكن اتكلم معاك شوية .

محمود : اذا كان فى القضية برضه ، يبقى ريح نفسك ، اتناقشنا كفايه وما اظنش حقتنعنى .. مقعدتش ليه ؟

محمد : أصلى مش لوخذى .. معايا واحد عايز يشوفك .

محمود : (ينظر باستفهام ؟) .

محمد : (ببعض الجرج) فؤاد سامى .

محمود : بس

محمد : (بسرعه) مفهوم .. وأنا قلت له انى اتكلمت معاك كثير .. انما هو مصمم .

محمود : (يهز كتفيه) .

محمود : معلى ، حاول تستحمله عشان خاطرى .

(يتحرك للباب وينادى) اتفضل يا فؤاد بيه .

(يدخل فؤاد بنشاط .. بدلين ، يدخلن

السيجار ، يرتدى بجله تلمع ، فى حوالى

الخمسين) .

فؤاد : بونسوار .

محمد : فؤاد بنامی

محمود : (بنفورتور) اہلا .

فؤاد : تشریفنا .

محمد : اتفضل .

فؤاد : (یجلس) أرجو ما تكونش عطفناک یا محمود بیہ .

محمود : لا

فؤاد : الحقیقۃ کان لازم نكون ذوق وفتق علی میعاد . ، انما
انا متعودتش اضعی الوقت ، لما محمد کلمنی عنک ،
قلت لازم اشوفک حالا .

محمود : فؤاد بیہ یشرب ایہ ؟

فؤاد : لا ولا حاجہ .

محمود : (ببعض التحدی) اہلا وسہلا .

محمد : آدی بقی الأستاذ محمود شخصیا وتقدر تتفاهم معاه
زی ما یحبیک .

محمود : افترک انت نقلت لی وجہۃ نظره .

محمد : انما یظهر هو عنده حاجات تانیہ عاوز یقولها لک .

محمود : خیر . . . ؟

محمد : اللہ اعلم ، حاکم فؤاد بیہ مخہ کبیر ، وفیہ حاجات
بیفصل یخبیہا حتی ع المحامی بتاعہ مش کده
یا فؤاد بیہ ؟

(فؤاد الذی ظل صامتا یقیس محمود بظہراتہ

ينتهي من اشعال سيجاره بهدوء ويضع مناقا
فوق سائق) •

فؤاد : لا .. لا مش صحيح •

محمد : هو ايه اللي مش صحيح •

فؤاد : (هواصلا للنظر لمحمود) والمسألة دي مش زي ما انت
فاهم اطلاقا •

محمد : كده ، طب يا سسيدي .. اديني عرفتكو ببعض ..
اسيبكو بقى تتفاهموا على راحتكم (يهم بالنهوض) •

فؤاد : (باشارة من يده) لا .. انت تخليك قاعد .. رايح
فين •

(ثم لمحمود) شوف يا استاذ محمود .. انا مش جاي
بخصوص القضية •

محمود : مش فاهم •

محمد : ولا أنا •

فؤاد : (مازحا) اسكت انت •

محمد : حاضر •

فؤاد : تفتكر انا مش عارفك يا استاذ محمود ؟ ابدأ .. لما
محمد كلمنى عنك ، حسيت انى اعرفك الى حد ما ..
وانا شخصيا بدعى انى ذكى ، يعنى افهم للناس كويس ،
لو انا جيت لواحد زي حضرتك وحاولت اقنعه ببراعتى
ايه يكون رد فعلك ؟

محمود : (لا يرد) •

محمد : حقيقتك أكثر م الأول انك مشى برىء .

فؤاد : مظلوماً . . . يس اسكت انت .

محمد : خاضر .

فؤاد : شفت انا فاهمك ازاي ؟ طبعاً دلوقتي حتمسأل امال انا
جاي لك ليه ؟

محمد : والله انا اللي نفسى اعرف .

فؤاد : اولاً انا متأكد انى كسبان القضية .

محمد : متشكر .

فؤاد : لا ، انا قصدى ان موقفى قوى من غير دفاع ولا وجع
قلب .

محمود : اسمح لى انا لسه ما فهمتش حاجه .

فؤاد : تفكر ما دام ما فيش امل فى اقنصاعك ، وفى نفس
الوقت ضامن القضية فى جيبي ، يبقى آجى ليه الا اذا
كنت عايز اتعرف عليك ؟

محمد : ياه . . . طب ما تقول كده م الصبح .

فؤاد : انا بتكلم جد . . انا ما اتعودتش اكذب .

محمد : يبقى على كده مش ح آكل من وراك عيش .

فؤاد : معايا يا استاذ محمود ؟

محمود : آسف . . يظهر ان فهمى بطل .

فؤاد : ايذا ، المسألة انك لسه مش مصدق انى ما جتشن عشاق
القضية .

محمد : الحقيقة ولا أنا !

(فؤاد ينهض ويتمشى قليلا ثم يقف) •

فؤاد : طب أنا أريحك •• ح أقولك كل اللي عندي بخصوص
القضية ومش ح طالبك باى رد وبعدين نفساها ،
وندردش علي راحتنا أوكى ؟

محمود : (يفتح ذراعيه ولا يقول شيئا) ••

فؤاد : باختصار كل اللي قالته الليت دى اللي اسمها تحية ••
محمد : فتحية ••

فؤاد : ايوه ، كل اللي قالته كذب •• مش لأنى عندي اخلاق ،
أبدا •• أنا ما عنديش مانع أعرف أى عدد م الستات ••

محمد : فى الحدود اللي تسمح بيها الصحة طبعا ••

فؤاد : لكن أنا مش وسخ للدرجة دى •• لو سألتنى هرفت كام
واحد من اللي مثلوا فى أفلامى ، أقولك كتير ، إنما
الكومبارس ؟ •• اسمح لى •• أمان إيه فايدة ان الواحد
يبقى منتج وعنده فلوس ها •• ها ••

محمد : بينى وبينك ما يمنعش برضه ترمم •• هاها ••

فؤاد : (بنجدية) شوف كل اللي أنا فاكركه ان الراجى جاب الليت
مره الاستديو ••

محمد : الراجى •• يعنى الريجيسير اللي بيورد الكومبارس ••

فؤاد : كنت بستريح بين شوتين تصوير •• قدمها لى وقعد
يشلحها •• كان عايز يضحكنى شويه •• جايز قلت
حاجه من باب الهزار •• مش فاكرك •• وبعدما كملنا

تصوير ونسيت الموضوع بالمره .. بشرفى ده كل
اللى حصل .

محمد : (بجديه) مش يمكن الريجى ده عمل معاها حاجه ؟
فؤاد : ممكن جدا .. الله اعلم .. ع العموم .. الواد الريجى
ده مابيفوتش واحده من تحت ايده ..
محمد : كل ده قلته لعمود ، وانا واثق انه ممكن يصحقه لانه
منطقي ، نقطة الضعف الوحيد ، ليه البت رفعت قضيه
عليك انت بالذات ؟

فؤاد : مؤكد كان نفسها تمثّل فى السينما وتبقى غريب
ومشهوره ، والياس بيعمى البنى آدم ، ثم يجوز تكون
مهفوفه فى عقلها ، دى هبله تقريبا ، ويجوز الريجى
استقل سذاجتها ونهمها انى ح ارافتها واخليها نجمه ،
ولا حسست انى مش مهتم بيها .. حقدت على .. يجوز
رفعت القضية عشان تشهر نفسها والجرايد تكتب
عنها ، يجوز قاصده تهدنى بفضيحه عشان تنبّز منى
قرشين او تخلىنى اشغلها .. فيه ميت احتمال .. حد
عارف الأشكال دى بتفكر ازاي ؟

محمد : دى هراقعه بليغه يا فؤاد بيه ، خساره فى الأتعاب اللى
حتديهاى !

فؤاد : ايه رايك انت يا استاذ محمود ؟

محمود : انت وعدت انك مش حطالبنى برد .

فؤاد : ده صحيح ، وقلت كمان انى مش عايز اتعنك ببراعتى ..
انا واثق اننا هنكسب القضية حتى لو احتجنا لكام
محمود : شاهد زور ؟

فؤاد : ايوه يشهدوا ان البنّت سيرها بطل ، وبكده تطلع
للقضية فشوش .

محمد : (ردا على نظرة محمود) والله ما قتلته عليها .. مش بقولك مخه كبير ؟

فؤاد : ده من حق ، لأن الشهود بتوعها زور .

محمد : فمسلا يا محمود .

فؤاد : صدقتى انا مش جاي اكسبك لصفى ، تصدق بالله ، المحامى الللى كان ماسك لها القضية قبل منك ، كان مستعد يتقاهم معايا .. لكن انا ما رضيتش ، الللى ابيه المحامى الخصم ، او للبت ، المحامى بتاعى اولى بييه .

محمد : (محرجا) انت ماحاولتش عشان سمعتك .. لو للبت اتنازلت عن القضية الناس حتقول انك دفعت لها .

فؤاد : ومين الللى نصحنى بكده ؟ مش انت ؟

محمد : لمصلحتك .

فؤاد : ولمصلحتك انت كمان ، كل ما مشيت فى القضية اتعابك حتزيد .

محمد : هو انت محدش يغلبك أبدا ؟

فؤاد : ارجو أن يكون الأستاذ محمود اقتنح دلوقتى ، أن موضوع القضية ما يهمنيش للدرجة الللى متصورها .
محمود : (لا يتكلم) .

فؤاد : انا راجل خبير يا استاذ محمود ، شغلتنا دى عايزه الخبرة ، مش خبرة السوق وبس ، أبدا .. الخبرة بالناس ، وعشان كده لما محمد كلمنى عنك جانى فضول اشوفك .

محمد : ما تقولش كده لحسن الرجل يفتكر انك جاي متفرج عليه .

سواد : لا صحيح . . انا احب اتعرف بالناس .

محمد : معرفة الناس فلوس ؟

سواد : لا خبره . . معرفة الناس بتوسع الخ . . كل الناس . . حتى لو كانوا مش لونك . . او كانوا اعداك . . لازم الواحد يعرف ويشوف ويفهم ، تصور لما محمد كلمنى عنك فكرت فى ايه ؟

محمد : فى ايه ؟

(الضوء يميل الى اللون الأصفر ويشع

بالتدريج) .

سواد : مش ح تصدق . . فكرت انك تكتب لى رواية للمسينما .

محمد : دى رشوه بقى .

سواد : انا باتكلم جد . . طب بغمتك انا مش سالتك هو بيكتب ولا لا .

محمد : (محمود) قلت له انك كنت بتكتب شعر فى زمان طبعا . .

سواد : حتى لو ما كنش فكر خالص فى الكتابه . . مش كل الناس بتعرف امكانياتها مما يعنى الممثلين والممثلات الللى اكتشفتهم اتولدوا ممثلين . . ؟

محمد : لكن اشمعنى فكرت ان محمود بالذات يالف لك روايه ؟

سواد : مجرد احساس . . وطبعا ممكن اكون غلطان . . الاول

لما قلت لى انه مش عايز يغير رايه فى القضية ، تخيلته وهو بيدرس قضية البت دى (ثم موجه الحديث لمحمود)
تصورتك بتتخيل قصه ميلودراميه بينى وبينها هي
البطله الضعيفه ، وانا للشريير اللى القدر وقمها فى
ايديه ، حاجة كده زى افلام فانتن حمامة القديمة ..
وبعدين مخى سرح وابتديت انا كما اتخيل القصة ،
بس زودت عليها شخصيه .. الشخصيه دى انت
نفسك .. محامى مثقف مثالى بيدافع عن البطله
المسكينه .. وطبعاً بيقع فى حبها .. سورى .. دى مجرد
قصه ثانيه خالص .

محمد : وطبعاً القصة حتنتهى نهايه سعيده .

فؤاد : مش مهم .. المهم فكرت مين يكتب القصة دى ، مالتش
غير الأستاذ محمود نفسه .. الكتابه عايزه شويه خيال
واسع ، وحبه تفكير مثالى او اخلاقى ومتها لى الصفتين
دول موجودين فيك .

محمد : بس انت واثق ان محمود حيوافق يكتب للسينما ؟ مش
جايز رايه وحش فيها ؟

فؤاد : انا متأكد ان رايه فيها وحش جدا .. لكن مو حيكتب
القصة ويسيب الباقي علينا .. الا اذا كان بيعتبر نفسه
احسن من نجيب محفوظ مثلاً .. هاها .

محمد : طلب نسأله مو .. ايه رأيك ؟

محمود : (بجسرك يده ويهم بالكلام لكنه يهز كتفيه ولا يتكلم) .

فؤاد : عيب كل المثقفين في بلدنا انهم ييشوفوا العيوب ، لكن ما حدش فيهم بيحاول يصلحها ..
(الضوء يتقطع على فترات متباعدة ثم بايقاع أسرع) .

فؤاد : اذا كان رايك في السينما بتاعتنا كده آدى فرصة ، ليه ما تعملش انت حاجة كويسة ؟؟ .. ماتفتكرش انى ضد عمل فيلم نضيف .. انا شخصيا عملت افلام علس كتير .. لكن وقتها راح .. مايفتش تجيب تمناها .. سينماها للى داخلين الكار جديد .. فلوقت كل ما يكون الفياحم نضيف وثورى ، كل ما ارباحى زادت .. انا بكلمك بصراحة ، امريكا النهارده بتعمل افلام هادفة .. بتنتج افلام ضد امريكا .. مايبخافوش .. يعنى الافلام دى حتعمل ثورة مثلا ؟ بالعكس بتثبت للعالم ان امريكا فيها حرية وديمقراطية .. الناس دى بتفكر صح .. العالم بيتطور ولازم نجاريه .. نص الافلام بتاعتى بتتوزع النهارده فى اسواق جديدة ، انا لسه بايع ست افلام لروسيا ، اربعة منهم ميلودراما قديمة والباقيين هادفين .. انا بطالب بحماية الفيلم العربى انشالله بمنع الافلام الأمريكانى ..

محمد : (مازحا) عشان بتسرك افلامك منهم .

فؤاد : انا بطالب بفرض قيود على توزيع الفيلم الهندى .

محمد : عشان بينافس افلامك فى السوق .

فؤاد : انا مشر ضد القطاع العام فى السينما •

محمد : لكن ضد التأميم •

فؤاد : انا أكثر واحد تعاونت مع القطاع العام •

محمد : قصدك سفيت منه •

فؤاد : انا عملت أفلام وطنية مليانه أفكار اشتراكية •

محمد : على طريقتك •

فؤاد : بالمناسبة فيه مهرجان سينمائى الشهر الجاى فى موسكو •
مش عايزين حاجة من هناك ؟

(يشح الضوء بحيث لا نكتبين سوى اشباح الثلاثة)

وبعد ثوان يعم الظلام الكامل الى نهاية المشهد •

فؤاد : البشر هما البشر فى كل مكان وزمان • ولازم فاخذ

بالنا من حاجة مهمه • التجارة شىء والمبادئ شىء •

وكل بلد النهارده بتدور على رفاهية شعبها ، من حق

كل شعب يبنى بلده زى ما هو عايز • انا راجل

ليبرالى حر • لا اومن بيمين ولا بيسار • لكن مؤمن

بالرفاهية والثروة • احنا بتضيع علينا فرص كتيرة

للتقدم عشان خايفين زده غلط • بنخاف م الشيوعيين

والاخوان • مع ان الاثنين بيناوحوا بفكر انسانى مثالى •

ليه مايسبوش كل واحد يفكر زى ما هو عايز ويكتب زى

ما هو عايز • الدنيا حقه ؟ لا عمر البلد جتبعي

شيوعية ولا اخوانية ولا حتى وفدية • لو كانت البلد

عازت بجد كانت بقت كده ولا كده • تفكر الأمريكان

عايزين الرأسمالية ولا الروس كانوا عايزين الاشتراكية ؟

ابدا ••• دول عملوها بالقوة ودول عملوها بالقوة •••

تقدر تقولى الصين النهارده مع روسيا اكتر ولا امريكا ؟
 النهارده امريكا بتزعزل حلفاءها عشان خاطر الروس ..
 والعرب ببشيلوا فلوسهم فى اوربا .. وأوربا بتتافق
 الجميع .. وآسيا نصها مع دول ونصها مع دول ..
 والعالم الثالث كل يوم برأى ومع ناس شكل ..
 والعالم العربى بيموت فى الأمريكان .. تقولى طب ايه
 مستقبل العالم ؟ أقولك فى التيارات .. التجارة حتقرب
 بين العالم .. انا راجل تقدمى .. انا مؤمن بأن الناس
 فى أى حتة فى الدنيا عايزه تعيش حره .. على
 مزاجها .. عايزه المتعة وراحة البال مش عايزه مشاكل
 ووجع قلب ، احنا شعب متدين لكن عمرنا ما حنبقى
 اخوان .. وشعب فقير ، لكن عمرنا ما حنبقى
 شيوعيين .. التعصب وحش ، بيخلى الواحد يتصور
 ان أفكاره هى الواقع .. والواقع ماحش يقدر يشوفه
 على حقيقته الا الانسان الانسان المحايد .. وأنا راجل
 محايد ووطنى حر .. أسألنى أقولك .. الفلاحين بيحبوا
 ربنا .. والمتقفين بيحبوا نفسهم .. والطبقة المتوسطة
 بتحب للتلفزيون وشارع الشوارع ، والطلبة فى
 الجامعة بيحبوا بعض ، وأنا بحب العمال والطبقات
 الكادحة لأنهم بيحبوا السينما .

محمد : (بمزاح) فزاد بيه .. انت مش حاسس انك زودتها
 شوية ؟

فؤاد : أبدا .. أبدا .. طب نسال الأستاذ محمود .. انت ايه
 رأيك يا أستاذ محمود ؟

(صمت طويل نسبيا ..)

موسيقى تبدأ خافتة ..

ثم ترتفع بالتدريج حتى المشهد التالى (

المشهد الثالث

- بعد مرور اسبوع •
- محمود يقف أمام المكتب وظهره للجمهور •
- يجلس باسترخاء للمكتب ويمد ساقيه فوقه •
- جرس التليفون يدق •
- محمود ينظر للتليفون •
- يبدأ فى اللعب بفتاحة الأوراق •
- التليفون يتوقف عن الدق •

(يظهر صادق عند الباب ويقول بصوت متردد)

صادق : أستاذ محمود !

محمود : (يلتفت نحوه)

صادق : أملك شاي ؟

محمود : (يهز رأسه بالنفي)

صادق : قهوة ؟

محمود : (يهز رأسه بالنفي)

(صادق يهم بالانصراف ، بينما يثق جرنج
التليفون ، صادق يلاحظ أن محمود لا يرد على
التليفون ، يتوقف ثم يعود خطوة للداخل)

صادق : طب أرد ؟

محمود : (لا يلتفت له)

(جرس التليفون يتوقف)

• صادق يهز رأسه بياس ثم يخرج

• محمود يعود للعبث بالفتاحة

يمد يده ويفتح الراديو .. الراديو يذيع بعض

• الاعلانات التجارية)

• صادق يدخل

• صادق : ألسنت فتحة

محمود : (ببطء ناظرا للسقف) قلت لها انها خسرت القضية ؟

صادق : (بدهشة) لا طبعاً يا فندم .. ده الحكم لسه

ما صدرش ..

محمود : (لا يرد) .

صادق : ادخلها ؟

(محمود يوميء برأسه .. يخرج صادق ..

محمود يفتح الراديو .. تدخل فتحية) ..

فتحية : صباح الخير يا استاذ .

محمود : (بفتور) أصلا .

فتحية : هو حضرتك مشغول ؟

محمود : لا ..

فتحية : أصل عم صادق قالى ان حضرتك مش فاضى تقابل حد .

محمود : كويس انك جيتى ، كنت عايز أبلغك انى مش ح أحضر
جلسة بعد بكرة .

فتحية : ليه ؟ خير يا استاذ .

محمود : اعتدرينى منسحب من القضية .

فتحية : ياندامتى .. لهو حضرتك مسافر أبو ظبى انت كمان ؟

محمود : لا ..

فتحية : لازم بقى .. (تسكت لحظة) والله انا مكسوفة منك

خالص ، انما وحياء ربنا الاتعاب حتوصلك بكرة فى
الجلسة .

محمود : مش ده السبب .

فتحية : أمال ليه ؟

(محمود ينظر لها طويلا .. ثم ينهض ويتمشى

قليلًا .. فتحية تتابعه ببصرها) .

محمود : ايه السبب اللي خلاكى انتى ترفعى قضية ؟

فتحية : نعم ؟

محمود : ليه لجأتى للمحكمة عشان تاخدى حقك ؟

فتحية : امال كنت اعمل ايه ؟

محمود : انتى .. انتى مستنوية المحكمة تعملك ايه بالضبط ؟

فتحية : (بدمشة) ايه الأسئلة الغريبة دى يا أستاذ ؟ العمل
عمل ربنا .. هى الحاكم مش معموله عشان المظلوم يشتكى
فيها وياخد حقه ؟

محمود : (يسكت) .

فتحية : والنبى ما انا فاهمه حاجه ، يعنى عايزنى اتنازل عن
القضية ؟

محمود : (بفتور) انتى حره .

فتحية : لا يا أستاذ .. قول كلام تانى .. انا فهمت .. أيوه ماهو
انا غلبانه وعلى قدى .. طبعا فؤاد بيه اكلك عشان
تسيب القضية .. كلكم على .

محمود : انتى فهمتى غلط .

فتحية : لا وحيات النبى ده ملعوب .. أيوه كلكم بهوات واتفقتوا
على ..

(ثم تبكى) .

محمود : (بضيق) من فضلك بلاش عياط .

فتحية : كده برضه يا أستاذ ؟ كده تخلا بى وانا اللي كنت
متعشمة فى مروتك .

محمود : قضيتك خسرانته .

فتحية : لكن انت قايلى ممكن اكسبها .

محمود : كنت مغفل .. فى المحاكم محدش بيكسب حاجه .. ثم
انتى عايزه ايه م المحكمة ؟ عايزاما تجوزك فؤاد بيه
ولا تشغلك فى السيام ولا تحكم لك بتعويض .

فتحية : اهر اللى للقاضى يحكم بيه .. المهم يترد لى شرفى .

محمود : شرفك مش حيترد لك أبدا .

فتحية : يعنى ايه بقى ؟

محمود : مسألة الشرف دى سبيك منها خالص .. لو مكانش
فؤاد بيه عمل معاكى كده كان غيره حيعمل .

فتحية : طب ودين النبى مما موكلينك !

محمود : (ينظر لها بغیظ) مادام كده يبقى مستثنيه ايه ؟ مع
السلامه .

فتحية : (متراجمة) ماهو انت يا استاذ كلامك غريب ، زى
ما يكون حد قساك على .

محمود : اسمعى .. انتى رحتى لفؤاد وانتى عارفه ولا لا ؟

فتحية : عارفه ايه ؟

محمود : اللى حيعمله معاكى .. وكنتى موافقه وراضية لكن هو
اللى رفض لأنه شبعان زيادة عن اللزوم .. مش دى
الحقيقة .

فتحية : طب والكعبة الشريفة ..

محمود : لا هي دي الحقيقة .. انتي بتكذبي .. كنتي عارفه ايه
اللى حيحصلك لما تروحي لناس زي دول .. انتي اللى
كنتي عايزه تبغيني نفسك هما اللى مارضوش يشتروا .

فتحية : انت معايا ولا ضدى يا استاذ ؟

محمود : مكانش لازم تكذبي على .

فتحية : انا مابكذبش يا استاذ ، هما اللى ضحكوا على .. لما
رحت لهم الفيلا .. عبده الريجيسير قالى اقلعى عشان
البية يشوف جسمك ينفع فى السیما ولا لا .. وبعد شويه
قام مشى .. عبده استفرد بى .. رحت لفؤاد بيه
الاستوديو .. طردنى .

محمود : يعنى عبده اللى استفرد بيكى .

فتحية : وطردنى زى الكلبه .

محمود : امال ليه اتهمتى المنتج ؟

فتحية : ماهو برضه السبب .. لو كان شغلنى فى السیما
مكانش همى حاجه .. لكن ده اهانى وداس على
كرامتى .. لازم افضحه .

محمود : مافيش فايده من ده كله .. قضيتك خسرانه .

فتحية : طب كلم فؤاد بيه يدفع لى تعويض وانا اتنازل .

محمود : كده ؟

فتحية : ايوه .. خسرانه .. خسرانه .. لكن ح افضحه برضه ..
حاوسخه زى ماوسخنى .. لو كان عايز يشترى
سمعته يدفع لى .

محمود : ويفضل هو نضيف ؟

فتحية : بفلوسى أبقى أنصف منه .

محمود : الغريبة ان فؤاد بيه لمح لى إنه مستعد يدفع .

فتحية : يبقى خلاص .

محمود : متأسف أنا مش مستعد .. دورى على واحد بلطجى .

يعمل لك الحكاية دى أحسن منى .

فتحية : بلطجى ؟ طب ده المحامى اللى قبل منك هو اللى شآر على .

بكده وقالى كمان أنه حيفضحه فى الجرايد لحد ما يدفع .

محمود : (يسكت) .

فتحية : طب دلنى على حل تانى .

محمود : (لا يرد) .

فتحية : (بخيبة أمل) لكن دى الجلسة بعد بكره يا أستاذ ..

انصحنى أتصرف ازأى .

محمود : دى مشكلتك أنتى .. تروحي تيوسى رجله .. تروحي .

تضربيه سكينه .. اللى يعجبك .

فتحية : يا نهار اسود .. أقتله ؟ ولما اضيع نفسى خينوبنى .

ليه ؟

محمود : نفس اللى خينوبك لو سبكتى .

فتحية : وانت اللى متعلم وقارى القانون كله بتقول كده .

محمود : القانون عندك أهو بحاله ، خديه اذا كان ينفعك .

فتحية : يعنى انت لما يكون حد ظالك تقتله ؟

محمود : (يسكت وقد فوجئ بالسؤال) .

فتحية : ماترذ يا أستاذ .

محمود : (بصوت خفيض) .. لا .

فتحية : اشمعنى ؟

محمود : لأنى .. لأنى مقدرش ..

(ثم يضع فتاحة الأوراق بحركة لا شعورية وكان
يعبت بها) .

فتحية : بس أنا مش جبانه يا أستاذ .

محمود : (بملل وهو يعطيها ظهره) طيب .. طيب .

فتحية : ايوه ، أنا ماخافش غير م اللي خالقنى ..

فتحية تقف لحظة .. ويسود صمت .. ثم تسرع

خارجة .. مرة واحدة ومحمود لا يكاد يشعر بها) .

(يدخل صادق ، ويضع فنجان قهوة على المكتب) .

صادق : القهوة يا متر .

محمود : (ينظر له بضيق) .

صادق : (بخوف) ده بن كويس يا متر .. أنا عايز اخدم والله ..

محمود : صادق .

صادق : (بخوف ، يرفع فنجان القهوة فى الحال) طيب بلاش ..

بلاش .

محمود : صادق ..

صادق : (يقف متوجسا) أفندم ؟

محمود : ليه الناس بتروح المحاكم ؟

صادق : هيه ؟

محمود : ليه الناس بتروح المحاكم ؟

صادق : برضه ربنا له حكمة في كده .. واهي ارزاق ناس يا متر ..

يعني لو مكانش فيه قضايا ومحاكم كنا احنا عملنا
ليه ؟ شحتنا ولا مؤاخذه ؟

محمود : (يهز رأسه) تمام .

صادق : (يضع فنجان القهوة ثانية بثقة) القهوة يا متر ..
خدمه ثانية ؟

محمود : أشكرك .

(يخرج صادق) .

(محمود يمسك بكرة أوراق ويقرأ هامسا .. حضرات .

المقضاء .. حضرات المستشارين .. القضية المعروضة

أمام عدالتكم اليوم) .

(يسكت ، يبتسم ويتمتم من بين شفقيه .. أرزاق) .

(يمزق الأوراق بهدوء ويتركها تتناثر من بين

أصابعه .. يمد يده بحكم العادة باحثا عن فتاحة

الأوراق ، لكنه لا يعثر عليها .. يرفع رأسه وينادي ' -

صادق ..

صادق : (يدخل) أفندم .

محمود : ماشفتش فتاحة الورق اللي كانت ع المكتب ؟

صادق : لا .. اشوفها لمساعدتك (بيخث فوق المكتب) :
(تدخل نبيلة بنشاط وتجدو عليها البهجة)

نبيلة : ايه الحكاية .. بضرب لك تليفونات مابتدش ليه ؟
محمود : يمكن عطلان .

صادق : (يرفع راسه وينظر لمحمود بدهشه لأنه يكذب بخصوص التليفون .. وعندما يرد له محمود نظراته يسرع بالكلام)
مش لاقياها .. لكن ضرورى ح اعتر عليها وأنا بنضف الأوضه .

نبيلة : آه صحيح .. ايه الورق ده كله .. ازاي قادر تتعد فى الفوضى دى ؟
(نبيلة تنحنى لجمع الأوراق الممزقة .. صادق ينحنى معها بسرعة)

صادق : عنك انت يا ست نبيلة ، الله دى مذكرة القضية بتاعت الست فتحية .

محمود : خطها عندك فى سبت الزبالة .. وادقى روح بكره تشوف لها محامى تانى .
(صادق يهز راسه ويضع الأوراق فى سلة المهملات ويخرج)

نبيلة : مش دى القضية اللي ماسكها قدام محمد .

محمود : ايوه ..

نبيلة : احسن برضه انك سبتها .. وايه اخبار القضية اياها ؟

محمود : لسه ميعاد الجلسة فاضل عليه شهر .

نبیله : انا حاسه اننا حنكسيها المره دى :

محمود : حتنساجل .

نبیله : ایش عرك ؟

محمود : كل شیء بيقول كده .

نبیله : اقولك بلاش فشيل الهم من دلوقتى .. اصلى النهارده :
مبسوطه ..

محمود : (ينظر لها بتساؤل) .

(تزيج شيئا من على كتفه باناملها ، وبلهجة صبيانية) .

نبیله : قوللى مبروك .

محمود : مش اعرف ليه ؟

نبیله : بس قول وخلص .

محمود : (بفتور) مبروك .

نبیله : الله يبارك فيك .. اسألنى بقى ع الخبر .

محمود : انتى رايقة قوى يا نبيلة .

نبیله : وح اظير م الفرح كمان ، ما هو الخبر يا سيدى ان امبارح ،
جالى عريس .

محمود : عريس ؟؟

نبیله : آه ، انما ايه .. لقطه يابنى

محمود : وبعدين ؟

نبیله : ولا قبلين .. دى تالت مره يتتخدم لى .. كل ما ينزل .

أجازة يجي يزورها والشبكة في جيبه .. شوف
يا سيدى .. مهندس .. وبقاله في الكويت خمس
سنيين .. عنده عربيه فولفو .. للشبكة خاتم سوليتير ،
الشقة في الكويت جاهزه بكل أدوات المنزل الحديث من
الايركوندشن .. الى الكتشن ماشين .. يبلغ من العمر
حوالى أربعين سنه .. يقضى الحياة الزوجية .. مستعد
يكتب الكتاب بكره ويسافر بيا بعد بكره .. ايه
رايك ؟

محمود : عايزانى اقول ايه ؟

نبيله : هو قاللى عندك يوم بحاله تفكرى وتقررى .. اصله
مسافر فى ظرف أسبوع .. وافت عارف باسبورى جاهز
من أيام ماكنت رايعه دى .. ماما وبابا .. قالولى
دى آخر فرصه ، فوقى افتى مش صغيره .. انتى
عندك خمسة وعشرين سنه ، وده جيهنيكى ويستتك ،
قلت لهم هو فعلا عريس لقطه بس خبارة (تقرب منه
وتلف ذراعيها حول عنقه) أصلى بحب واحد اسمه
محمود .. هو صحيح مايستاهلش حبي ، لكن اهو بقى ..
قسمتى .

محمود : (باهتمام مفاجئ) قلتى كده فعلا ؟

نبيله : (تهز رأسها بالإيجاب) .

محمود : وبعدين ؟

نبيله : (تبتعد عنه بحركة تمثيلية) لا .. أنا زعلانه منك .

محمود : (ينظر لها بعدم فهم) .

نبيلة : ايه .. مش عاجباك تسريحتي الجديدة ؟ اخس عليك .
ده انا قصيته مخصوص عشائك .

محمود : وبعدين يا نبيله .. حصل ايه ؟

نبيلة : (مبتسمة ومتلذذة باهتمامه) طبعا ماما اغمى عليها
م الزل ، وبعد شويه خنساك وعكفنه حصل المراد ،
وحماكك العزيمة بتهديك السلام وبتقولك اتفضل شرف
بكره جيعبك اللبن بتاعنا .

محمود : (ينظر لها قليلا ثم يتمشى) مش عارف اتقوك ايه
يا نبيله .

نبيلة : فى ايه يا خبيبي ؟

محمود : انتى ايه اللي خلاكى تقوليلهم دلوقت اننا حنتجوز .

نبيله : ما احنا كان لازم حنقول .. ثم انا اضطرريت
يظهر محمد لمح لهم بحاجه .. لكن انت مالك ؟

محمود : (بهدوء) نبيله .. انا مش ح اتجوزك .

نبيله : (تنظر له مبهوتة) .

محمود : (يقترب منها ويتناول يديها بين يديه) انا بحبك ..

وعمرى ما اتقدر احب واحده غيرك .. لكن دلوقتي ..

ارتباطنا .. قصدى .. (ويتلعثم)

نبيله : (هامسة) ايه اللي حصل يا محمود ؟

محمود : (يسحبها من يديها ويجلسها على الاركة ويجلس

بجوارها) نبيلة ، اذا كنتى بتحبينى ، حاولى تفهمينى

.. ولو ما قدرتيش حاولى ع الأقل تسامحينى .. يا

نبيلة انا .. (لكنه يعجز عن الكلام) .

نبيله : محمود .. مش لازم تتكلم دلوقتى .

محمود : (يقف فجأة بعصبية كأنه مفتاظ من نفسه) لا ..
لازم اتكلم .. من حقك انى أشرح لك موقفى .. انا
فقدت ايمانى بكل الناس .. وبكل شىء حتى نفسى ..
بقيت أكره الناس .. كل الناس .. والزحمة ، والضجة ،
الضحك الغبى اللى مالوش معنى .. البكا الأبله ..
الحماس الفاضى والخطب .. والكتب والكلام .. الكلام
بكل أنواعه .. كل يوم بيهر بحس انى يبعد عنهم ، انى
غريب ، مش منتمى لآى شىء .. انى بيعيش كابوس ..
ساعات بتراودنى خيالات شريرة ، أتصور كارثة
بتحصل .. وأنا هادى .. ساكت .. سعيد سعادة
غريبة ، غامضة كانى بنتقم من روى .. انا فقدت القدرة
على الحب يا نبيله .. مابقتش أحب نفسى زى زمان ،
ولا احترمها ، مابقتش احترم حد .. انا زى ما أكون
قنبله زمنيه حتنفجر فى أى لحظة .. بسمعا جوايا
بتحق كأنها النبض اللى فى جسمى .. زى ما أكون
فقاعه كبيره ، زى كدبه بايخه ، سراب ، وهم .. زى ..
لا مش ده اللى عايز أقولهولك ، مش ده .. انا عارف
انى سخييف وعاجز و ...

نبيله : (نايضة) محمود .. انت مش فى حالة طبيعية ..
صحقتنى ، لازم تساعد نفسك .. تعال نخرج نروح حته
فيها هوا ..

محمود : لا يا نبيله .. انا انسان مريض .. كنت بكذب عليكم
وعلى نفسى .. لكن انا فعلا مريض .. بحارب طواحين
الهوا .. كذبت لما قلت انى بحاول أنقذ نفسى .. محمد
كان عنده حق لما قال انى اصالح الكون ..

نبيله : قوام نسيت اللي قلتولي ؟ مش قلت لي انك حطفت
راسك في صبرى وتنسى كل حاجة ؟ ليه تبعد عنى كل
ما تكون محتاجنى .. كل ما تكون لازم تقرب منى ؟ ليه
تكبر نفسك في اللحظة اللي لازم تحترمها .. ايه اللي
خايف منه ؟

محمود : خايف من نفسى يا نبيله .. مش عارف ايه اللي ممكن
يحصل لى بكرة .. ممكن ابيع نفسى .. ممكن ابقى زى
محمد ، او زى فؤاد بيه ، ممكن اتجنن او انتحر ..
اضيع نفسى على اى صورة من الصور ، لكن مش ممكن
استمر زى ما انا ، لازم يحصل حاجة .. اسافر ..
اهاجر .. اغير مهنتى .. كل شىء محتمل ، عشان كده
مش لازم اربط مصيرى بمصيرك .. مش لازم اعذبك
معايا .

نبيله : (تحيط وجنتيه براحتها وترفع ذقنه لينظر فى عينيه)
بالعكس يا محمود .. مصيرنا لازم يبقى واحد - بص
لى .. انا مش خايفة .. انا مستعدة لآى حاجة .. احنا
حنعرف ازاي نخلق سعادتنا ، نخلق لنا دنيتنا ..
مايهمكش حاجة .. اذا ماكنتش عايز الشغل ، بلاش ..
نقدر نعيش بماهيتى .. نقدر ناخذ اوضه فوق
سطوح ، فى عشه .. مش حنموت ابدا ، حنعيش ،
حنعيش زى بقية الناس اللي عايشين .

محمود : دى اوهاام يا نبيله .. ماحدث يقدر يصنع سعادته
لوحده ، مستحيل نحارب عشان نفسنا وبس .. عشان
سعادته يتيمه جبانه مالهش معنى .. مستحيل .

نبيله : (باحساس من يوشك على الفرق) وانا يا محمود ؟

ما فكرتش في ؟ ما فكرتش ايه اللي ممكن يحصل لي من غيرك ؟

محمود : انا مش بتخلي عنك يا نبيله .. ابدا .. انا عايزك ، لكن خايف عليكي من نفسي .. مش بايدي ، صدقيني .. حبك وحنانك اغلى شيء في حياتي وأكثر شيء بيعذبني ..

نبيله : (تتراجع خطوة وتنظر له وكأنها لا تعرفه) لا ، انت ابائني ، انت فعلا ابائني .. انت هس يا محمود .. ايوه .. ما انتاش بطل ..

محمود : أرجوك يا نبيله ..

نبيله : اتفقنا .. ح اسيبك ، لكن الماره دي بجد .. فاهم ؟ مش حتشوفني تاني .. عمري ما ح اغفر لك اللي عملته معايا ..

(تتحرك لتأخذ حقيبتها)

محمود : نبيله ..

نبيله : ولو اتجوزت في يوم يا محمود ، مش ح أضعف ، مهما كان الراجل اللي ح اتجوزه ، مش ح اندم .. لأنني النهارده ببس عرفت معنى الخيانه .
(يتهدج صوتها ، محمود يدفع ويمسك يدها)

محمود : نبيله حبيبتي .. انتي ما فهمتنيش .. انا .. انتي .. انا مستعد اتجوزك .. و .. ودلوقتي حالا .. لكن انا مش مسئول .. انا ..

نبيله : وانا مش بشحت منك .. (تجذب يدها وتخلصها من يده) اللي قلته كفايه .. اللي كان مستحيل بقى حقيقه .. انت علمتني ازاي اكرهك .. اوعي (يدخل محمد فجأة)

محمد : نبيله ، محمود .. ايه الحكاياه ؟
(نبيلة ومحمود يجمدان لحظة ، ويتحاشيان النظر الى
محمد) .

(محمود يخرج فجأة مسرعا دون كلمة) .

محمد : (يتحرك خلفه) محمود .. الله .. استنتى بس ..
محمود .

(نبيلة تسوى شعرها وملابسها وتهم بالخروج) .

(محمد يستدير عائدا اليها ويعترض طريقها) .

محمد : نبيله .. مش تفهمينى ايه اللى حصل .

نبيلة : (بكبرياء) مافيش .

محمد : (يمسك يدها) مش ممكن اسيبك تخرجى وانتى فى
الحاله دى .

نبيله : (تتجمع الدموع فى عينيها ويتهدج صوتها) أرجوك
يا محمد .

محمد : (بأسى) بلبل تعيط ؟؟ ده معقول ؟

(نبيلة تجهش بالبكاء دفعة واحدة رغما عنها) .

(محمد يحتضنها بلا مقاومة منها) .

(محمد يغمض عينييه يارتياح دفين ويقول ببطه) ..

نبيله .. نبيله حبيبتي .. مافيش حاجه فى الدنيا

تستحق دموعك .

(ستار الفصل الثانى)

(الفصل الثالث)

المشهد الأول

- بعد مرور عشرة أيام •

- صادق نائم على مقعد المكتب وقد اسند رأسه فوق يديه •• يدخل محمود بعد لحظة ويبدو مرهقا وقد طالبت ذقنه ، يقف وينظر لصديق ثم يجلس على المقعد الموضوع أمام المكتب ويطوح رأسه للوراء •• لحظة صمت ، ثم يفيق صادق ، بفاجأ بمحمود •• يهيب واقفا •

- صادق : الاستاذ ؟ !
- محمود : (لا يتحرك ولا ينظر له) .
- صادق : لا .. لا مؤاخذه .. اصل خديتى سنة نوم .. اتفضل يا متر .
- محمود : خليك .
- صادق : افننحم ؟
- محمود : المكتب لابق عليك .
- صادق : (بخجل) الفو يا فندم ، وأنا ايه يوصلنى .
- محمود : (وكأنه يحدث شخصا غير صادق) ليه محدش عايز يصدقنى ؟ .
- صادق : يا فندم (ثم يسكت ويجلس منفذا امر محمود بتردد) حاضر (ثم لا يلبث أن ينهض مسرعا دون اقتناع لا .. مش ممكن .
- محمود : ماحدش نال عليا ؟
- صادق : كتير يا متر ، وأنا قلقت على خضرتك وماكنتش عارف اتصرف ازاي .
- محمود : نبيلة ماجتش ؟
- صادق : (بهم بقول شيء ثم يغير رأيه) لا .
- (محمود ينهض ويتمشى ، صادق يتابعه بحيرة وقلق ودهشة) .
- صادق : الظرف ده جه لسيادتك امبارح .
- (محمود ينظر للمظروف فى يد صادق ولا يتناوله صادق يضطر لتركه على المكتب) .

صادق : هو لأمواخذه حضرتك كنت مسافر ؟

محمود : مين اللي سال عليا ؟

صادق : (مرتبكا) للزباين طبعا ٠٠ و ٠٠ (ثم يسكت) .

محمود : (متلفنا اليه الآن فقط وبشك) وايه ؟

صادق : و ٠٠٠٠ وحضرة وكيل النيابة .

محمود : (بعدم فهم) وكيل النيابة ؟

صادق : ايوه ٠٠ هو حضرتك ماعرفتش باللي حصل ؟

محمود : بخصوص ايه ؟

صادق : القضية ٠٠ قضية الست فتحية .

محمود : انا مش قلت لك تحضر وتأجلها .

صادق : ما هو اصل يا فندم ، يوم الجلسة ، هو حضرتك كنت مسافر ؟؟

محمود : انت مابتتكلمش على طول ليه ؟

صادق : مانيش يا فندم ، انا فاكرك عرفت باللي حصل

محمود : انا مش فاهم حاجه .

صادق : القضية يا فندم .

محمود : مالها .

صادق : ع العموم القضية نفسها مش مهمه .

محمود : امال ايه ؟

صديق : ألقى حصل بعد القضية وحضرتك مسافر .. مش برضه
حضرتك كنت مسافر ؟

محمود : (بعصبية) إيه ألقى حصل ؟ اتكلم .

صديق : (يتكلم فوراً) الأستاذ محمد يا فندم .

محمود : ماله .

صديق : (بسرعة شديدة) بعد الجلسة ، وهو خارج مع فؤاد بيه
قدام باب المحكمة ، فتحية هجمت عليه وحاولت تقتله .

محمود : تقتل مين ؟

صديق : (بسرعة شديدة) فؤاد بيه .. الأستاذ محمد حاول

يحوش عنه ، جت الضربة فيه هو ، نفلوه ع المستشفى .

محمود : (يسكت ناظراً له في ذهول) .

صديق : انت كنت فين يا متر ، ده وكيل النيابة سأل على حضرتك

مرتتين .. اسمه طلعت بيه ، ويعرف حضرتك كويس .

محمود : الكلام ده حصل امتى ؟

صديق : بقول لحضرتك بعد الجلسة ، من حوالى تسع تيام .

ماهو فؤاد بيه كسب القضية وطلع براءه .

محمود : ومحمد لسبه في المستشفى ؟

صديق : لا .. خرج تانى يوم .. الجرح بسيط .. يدوب ثلاث

أربع غرز ، جت سليمة .

(محمود يتحرك ناحية الباب ثم يقف ويلتفت

لصديق) .

محمود : انت متأكد ان نبيله متصلش خالص ؟

صادق : لا ، بس الاستاذ محمد فات امبارح وساب لك الظرف ده .
• (محمود يعود ويتناول المظروف ويتأمله) •

صادق : (وكأنه يهرب) أروح اعمل لسيادتك فنجان قهوة .
(محمود يبحث عن فتاحة الأوراق ، ثم يهيم بفتح
المظروف) •

• (صادق يعود في الحال) •

صادق : طالعت بيه وكيل النيابة .. اخلية يتفضل ؟؟ (لكن طلعت
يدخل ومعه كاتب) •

طلعت : صباح الخير .. ازيك يا محمود .. متأخذنيش لقيت
الباب مفتوح •

• محمود : أهلا •

طلعت : ايه ده يا راجل .. كنت فين ؟ بقالى ثلاث ايام
مستنيك •

• محمود : مستنييني ؟ (ثم يلحظ وجود الكاتب المرافق لطلعت) •

طلعت : لكن ولا تزعل يا سيدى .. ادينى جت لك بنفسى ، مش
حتقولى اتفضل (ويجلس بالفعل) •

• محمود : اتفضل •

طلعت : (يشير للكاتب فيجلس ثم يلتفت لصادق) ممكن نشرب
التنين ع الريحه •

• صادق : طبعا يا سعادة البتية (يخرج صادق) •

طلعت : سلامات يا محمود .. واحشنى والله ... سيجارة ؟

• محمود : (يتناول منه السيجارة كالنوم) •

طلعت : والله زمان .. وحشتنا أيام الكلية .. ومناقشاتنا
ع الكافتريا ، فاكرك ؟

محمود : (يهز رأسه) .

طلعت : أنا فيا شيء لله ، تصور لنى حلمت ببيك قريب (يشعل
سيجارته ثم يكمل) قبل الحادثة مافيش يومين تلاته .

محمود : تقصد حادثة فتحية ؟

طلعت : أيوه ، الا صحيح ايه الموضوع ده ؟

محمود : أنا ماعرفتش بيه غير دلوقتى ..

طلعت : لا ؟؟

محمود : انت اللى ماسك التحقيق ؟

طلعت : أيوه يا سيدى .. شفت بقى الصدف ؟ احسن ماكنتش
بتؤمن بالصدف .. ولا غيرت رأيك ؟ (ويضحك) .

محمود : لا .. أبدا ..

طلعت : طب أذكرك وقعت فى ليدى اهو .. أما نشوف بقى حتغير
رأيك ولا لا .

محمود : ما افتكرش فيه سبب يخلينى اغيره .

طلعت : ااره دى لازم تغير رأيك ونص ، لأن ده فى مصلحتك .

محمود : وأنا ايه علاقتى بالحادثه ؟

طلعت : ولا حاجة .. بس المتبه بتقول انك حرصتها تقتل فؤاد
بيه .

محمود : (ناهضا) انهم من كده انى متهم ؟

- طلعت :** (ضاحکا) مش بقولك وقعت فى ايدى •
- محمود :** (ببرود) ومستنى ايه ماتيتدى التحقيق •
- طلعت :** الله ، انت زعلت ؟ يا راجل ، ده انا بهزر معاك •
- محمود :** انت عارف انى مش مؤمن بالصفه ، يعنى اى هزار من النوع ده ح افسره انه مقصود •
- طلعت :** كده ؟ طب ولما قلت لوكلتك ان مافيش حل غير انها تعندى ع الراجل كنت بتقصد كلامك دا بجد ولا كان مجرد كلام بالصفه ؟
- محمود :** (يسكت وقد فوجئ) •
- طلعت :** شفت ؟ ؟ اسمع يا محمود يا خويا •• انا جاى ادرش معاك •• انسى حكاية التحقيق دى خالص دلوقت •
- محمود :** (يلتفت للكاتب بنظرة ذات مغزى) •
- طلعت :** (ضاحكا) بالشرف جه معايا صفه •• لو تحب نفعو لوحدا ، ما عنديش مانع •
- محمود :** بس انت مضطر تحقق معايا بشكل رسمى ، ان مكانش دلوقتى، يبقى بعدين •
- طلعت :** والله انا ماسك القضية دى وانا متاذى وربنا عالم •
- محمود :** عشان كده كبست على اول ماوصلت •
- طلعت :** صفه برضه •• طب انا اعرف منين انك لسه واصل ؟
- انا عايز اوفر عليك مرواح النياية •
- محمود :** وانت ليه خدت كلامى جد •• مش جايز بهزر انا راخر ؟

- طلعت : مش باين عليك .
- محمود : يعنى اى كلام مهما كانت كمية السم اللى فيه نقدر نعتبره مزار لو الواحد قاله وهو بيبتسم ؟
- طلعت : الله يسامحك .. انت راجل دماغك ناشفه
- محمود : وانت طول عمرك بتطلع الأول والطالب المثالى .
- طلعت : ده فضل من الله سبحانه وتعالى .
- محمود : (ساخرا) ده اذا اعتبرنا التفوق ميزة !
- طلعت : انت نكى مافيهاش كلام .
- محمود : اشكرك .
- طلعت : انتك الوحيد انك ولحد الدنيا بتحدى وعقلك بيشطح بيبك .. انا اراهن .. غيابك الأيام اللى غابت كان شطحه من اياهم .
- محمود : انتدر اعتبر التحقيق ابتدى ؟
- طلعت : هو انا مش حا اعرف اتكلم معاك والا ايه ؟
- محمود : انا مش ضد انك تستجوبنى .. بالعكس ، انا افضل ده يحصل بسرعة ونفتى .
- طلعت : اظان مافيش داعى اقولك انى عايز اساعدك .
- محمود : عايز تساعدنى ازاي .. ؟ ممكن تخالف ضميرك القانونى ؟
- طلعت : لا .. فى اطار القانون .. الموضوع ممكن يكون بسيط .. ويمر بسلام ، وجايز يكون موقفك تخرج ويأثر على مستقبلك كله .

محمود : يعنى مستقبلى فى ايجك •

طلعت : العفو •• كل شىء بيد الله •

محمود : متبهاالى ندخل فى الموضوع •

طلعت : شوف يا سيدى باختصار البنيت بعد ما عملت عملتها عايزه

تخرجرك ، بتدعى انك انت اللي حرضها تعتدى على فؤاد

بيه ، طبعا كلامها ماهواش قرينه ضدك ، وتقدر تنكره ،

وانا مصدقك •• لكن المشكلة فى الفتاحه •

محمود : الفتاحه ؟

طلعت : آه ، انت ماعرفتش انها ضربته بفتاحه الورق ؟

محمود : (يسكت فى دهشة) •

طلعت : (يتناول فتاحه الورق من فوق المكتب) فتاحه زى دى

بالظبط ؟ وسنها حامى برضه •

محمود : (يسكت) •

طلعت : دى حتى بتقول انها بقاعتك •• تصور ؟

محمود : انا فعلا ضاعته منى واحده ، واشتريت دى بدالها •

طلعت : ياه ، وضاعت امتى ؟

محمود : (متذكرا) آخر مره كانت فتحه منا •

طلعت : يعنى قبل الحادثة بيومين •

(ثم يلتفت فجأة للكاتب الذى بدأ يسجل

الحوار) •

طلعت : لا لا ماتككتبش حاجه •

محمود : (بحيرة) يبقى خديتها من غير ما تقوللى

طلعت : طب وانت مالك .. قفهمك ليه بقى ؟ اما بنت كلب
صحيح .. استغفر الله العظيم .. بالشكل ده مانيش
عليك اى مسئولية قانونية ، والكام يوم اللى اختفيت
فيهم ، نقدر نقول انك كنت .. بالحقي هو انت كنت
فين ؟

محمود : وده ايه دخله فى الموضوع ؟

طلعت : ابدأ .. بس عشان نستوفى التحقيق من الفاجية الشكليه
لحسن يقولوا حرضتها وهربت ولا حاجه .. قلت لى
كنت فين ؟

محمود : فى اسكندرية .

طلعت : خالص . يبقى اتحطت .. كان عندك قضية هناك ، مش
كده ؟

محمود : لا ..

طلعت : ما هو طبعا مش حنقول كنت بتصيف .. ده احنا فى القلوبه
(ومتصنعا المزاح) تلاقىك رحمتك هناك يا دبور مه ؟
اعترف :

محمود : (يسكت وينظر له) .

طلعت : ماتحاولش تفكر .. واحد يسيب شغله من غير مايدي
خبر لمخلوق ويسافر فى البرد ده يبقى فيها انه ، يا رايح
لواحدة يا هربان منها عشان ينسى .

محمود : عاوز توصل لايه ؟

طلعت : ولا حاجه .. المساله كده بالمقل .

محمود : انتوا لحتقوا تجمعوا عنى ثحريات ؟

طلعت : (ضاحكا) هو كلامى جه على الجرح بجد ولا ايه ؟

محمود : محمد اللى قالك طبعاً ،

طلعت : الرجال ماقالش عليك غير كل خير .

محمود : وطبعاً جاب سيرة نبيله ؟

طلعت : نبيله مين ؟ يا راجل ماتكبرش الموضوع ... فتحيه دى

تلاقيها بت مهفوفه .. الأشكال دى عارفينها .. ماعدش

فيه اخلاق ولا قيم .. وانت عارف عقل النسوان ..

ناقصات عقل ودين . الشئ الغريب ايه اللى خلاها تدعى

عليك كده ؟

محمود : (يسكت)

طلعت : ولا انت قولت لها كده فعلاً ؟ يعنى سكت ؟ أنا اقولك ..

صدفه برضه .. قعدت تتفلسف زى عوايدك ، شطيت

وقلت كلمتين من اياهم ماخذتش فى بالك ان البت عقلها

طابق .. راحت عملت عملتها فى لحظة جنان .. لكن

ارجع اقولك برضه الصدف بتلعب بينا .

محمود : (بهدوء ما قبل العاصفة) لا ،

طلعت : لا ايه ؟

محمود : مش كده .

طلعت : ماهو يا كده ، يا اما انت بقى قاصد تحرضها .

محمود : انت بتهددنى ؟

طلعت : لا سمح الله ، أنا عاوز اساعوك .

محمود : أنا أرفض التهديد .

طلعت : مالك يا محمود .. بتكلمنى كده ليه ؟

محمود : انت اللى لازم بتغير لهجتك معايا .

طلعت : تقصد ايه .. مش فاهم .

محمود : لا انت فاهم كويس .. مافيش داعى للاستئالة الملقوفة ،
مافيش داعى للغمز واللمز ، وفر مساعدتك ، اذا كنت عايز
تتشفى فى خليك صريح وواضح .. مافيش داعى
للخدل .

طلعت : لا .. ده كتير (ثم متلفتنا للكاتب الذى يجلس دون كتابة)
ماتكتبش الكلام ده .

محمود : لا اكتب أنا مش خايف منك .. مش خايف من حد ..
أنا ماقتلهاش تقتله ، لكن مكانش كلامى صحفه ..
ولا شطحات ، ماتساومنيش .

طلعت : اساوكم ؟ اساوكم على ايه ؟

محمود : انى اغير رأىي .

طلعت : تأكد ان ده مايهمنيش ، وانى مابحملكش اى كراهيه او
حق ، بالعكس ، ومستعد اقسم لك بالله ورسوله ..

محمود : اسمع .. أنا بكرة .. افتكر ده كفايه ويخلينا نختصر
السكة .

(للكاتب) لو سمحت افتح المحضر .

(لطلعت) تقدر تاخذ اقوالى بشكل رسمى ؟

(يدخل صادق بالقهوة ، طلعت ينتظر حت

يخرج) .

طلعت : ده رايك النهائي ؟

محمود : أيوه .

طلعت : (ببعض التحدى) وهو كذلك .

(يخرج منديلا يجنف عرقه ، ويشير للكاتب بالجلوس الى مكتب محمود) .

الكاتب : الاسم .. والسن .. والوظيفة .

محمود : البطاقة ايميه ، واى معلومات تانيه عارفها حضرة وكيل النيابة ، بما فيها طباعى وأخلاقى وشطحاتى .

طلعت : (بقوة) أنا ما اسمحش لك تقول كلمة واحده زياده .

محمود : (محنيا رأسه) متأسف .

طلعت : سين .. متى رايت المتهمه فتحيه لآخر مره قبل الحادث .

محمود : جاتنى المكتب من حوالى عشر تيام ، وما عنديش علم بأى حوادث .

طلعت : هل صحيح انك انسحبت من الدفاع عنها ؟

محمود : أيوه .. لأن قضيتها كانت خسرانه ..

طلعت : المتهمه ادعت انك انت اللى حرصتها تقتل فؤاد بيه .
فهل هذا صحيح ؟

محمود : أنا ماحرصتهاش .. أنا كنت بقول راىي .. ان قضيتها مالهاش حل فى الحكمة .

طلعت : لكن حسب أقوال المتهمه انت اقترحت عليها وسيلة محددة ، قلت لها اضربيه سكينه .

محمود : قلت لها تطلب منه يسامحها وتبوس رجله أو تضربه
سكينه .. وده على سبيل المثال .. مجرد توضيح
الرأى .

طلعت : أمال بتفسر بايه انها استعملت الفتاحه بتاعتك فى
الاعتداء على المجنى عليه ؟

محمود : اعتقد السؤال ده تساله لها مى .

طلعت : انت حتعلمنى شغلى ؟؟

محمود : كل انسان مسئول عن تفسير تصرفاته بيس

طلعت : سين .. كنت فين يوم الحادث ؟

محمود : يوم الجلسة ، سافرت الصبح بدرى اسكندرية .

طلعت : وايه الفرض من سفرك ؟

محمود : مانيش سبب .

طلعت : انت متعود تتصرف بدون وعى

محمود : ماقلتش بدون وعى .. قلت بدون سبب .

طلعت : انت بتنكر قانونية السببية .. ؟

محمود : كنت عايز اختاى بنفسى .

طلعت : الاجابة نفسها محتاجه تفسير .. ليه كنت عايز تختلى
بنفسك ، لأسباب نفسيه ؟ عاطفيه ؟ لارهاق فى العمل ؟

محمود : انا مش شايف علاقة بين سفرى وموضوع التحقيق .

طلعت : انا الى اقرر ده مش انت .

- محمود : يبقى أمتنع عن إجابة السؤال .
- طلعت : ليه سافرت سرا. ودون أن تخبر أحدا ؟
- محمود : قلت لنى كنت عايز أبقى وحدى .
- طلعت : وشغلك ؟
- محمود : أنا حر فى الطريقه اللى أمشى بيها شغلى .
- طلعت : كنت بتعمل ايه فى اسكندرية ؟
- محمود : ماكنتش بعمل حاجه مهيئه .
- طلعت : الإجابة محتاجه تفسير .
- محمود : تقدر تقول انى كنت بتأمل مشاكل الكون ، مأساة الانسان المعاصر .. واضحه الإجابة دى ؟
- طلعت : واضحه .. لكن غير معقوله ومقصود بيها السخرية .
- كنت بتروح غين .. بتقابل مين ؟
- محمود : ماكنتش بروح أماكن محدده ، الشوارع ، الجنائين ، الكورنيش ، القهاوى .
- طلعت : تقصد مجرد تسكع ؟
- محمود : ماغنديش اعتراض على التسمية .
- طلعت : سين .. متى علمت بالحادث ؟
- محمود : للهارده ، من وكيل المكتب بتاعى .
- طلعت : هل لاحظت شيئا من الاضطراب النفسى على المتهمه ؟
- محمود : أمتنع عن الإجابة .

طلعت : ايه رأيك فى الحادث ؟

محمود : امتنع عن الاجابة .

طلعت : ما هو شعورك عند سماع نيا

محمود : (مقاطعا) امتنع عن الاجابة .

طلعت : ايه رأيك فى سلوك المتهمه ؟ ايه حكمك الاخلاقى عليها ؟

محمود : (لا يرد) .

طلعت : (للكاتب) اقلل المضر .

(الكاتب يقدم الحفتر لمحمود فيوقع عليه دون

اكتراث) .

طلعت : تفكر اسارب الامتناع عن الاجابة حيفيك بحاجة ؟

محمود : انا برفض طريقتك فى التحقيق .. وعندى الشجاعه انى

اقول كل شىء قدام الحكمة .

طلعت : يبقى حنتقابل هناك .

(ثم يشير للكاتب وهو يخرج بسرعة) .

(محمود يجلس بارهاق على المقعد الموضوع امام

الكاتب) .

(صادق يظهر عند الباب) .

صادق : اى خدمه يا متر ؟

محمود : (بعد لحظه) انت متأكد ان نبيله ماتتلتش ؟

صادق : لا يا متر .. انما الأستاذ محمد لما جه اتصل بيها ون

هنا فى الاتليفون .

محمود : ما عرفتش ليه ؟

صادق : أنا سمعته بالصدفه بيقولها .. هو حضرتك ما فتحتش
الظرف اللي سابه .. ماهو ده بخصوص الأستاذة نبيله .

محمود : (ينهض ويتناول الخطاب) كان بيقولها ايه ؟

صادق : سمعته بالصدفه بيقولها أنه مالقاش حضرتك و

محمود : (يفص الخطاب بالفتاحة) وايه ؟

صادق : وانه اتفق مع الماذون .

محمود : (بعدم فهم) ماذون ؟

صادق : أيوه ، والظرف ده فيه دعوه لسيادتك .. ماهو الأستاذة
كان كتب كتابها امبارح .

(محمود ينظر لصادق بذهول وتعبيرات مختلفة
على وجهه) .

* * *

المشهد الثانى

- بعد مرور أكثر من شهرين •

- الحجرة فى فوضى •• بغض الأثاث مكمّ فى
جانب •• كتب على الأرض •• حقيبة كبيرة
فى ركن •• محمود يقفّ مقعدا لفتحية ••
وهى الآن ترتدى بنطلونا وبلوزة شفافة وعلى
رأسها باروكة صفراء •

- تجلس فتحية على المقعد بينما يستند محمود
بظهره الى حافة المكتب •

محمود : اتفضلی •

فتحیه : انت بتعزل ولا ایه ؟

محمود : حاجه زی کده •• وازیك دلوقتی یا فتحیه •

فتحیه : زی ما انت شایف •

محمود : انا شایف انك اتغیرتی خالص •

فتحیه : نعمده •• جت سلیمه المره دی •

محمود : لكن ما انتضایقتیش لا المحامی طلعتك مجنونة ؟

فتحیه : مش احسن م الحبس ؟ مجنونه مجنونه بس اعیس •

محمود : انا مستغرب •• ازای الخصوم سلموا بالسرعة دی ؟

فتحیه : ماهو محامی فؤاد بیه اللى شار علینا بکده •

محمود : محمد ؟

فتحیه : ایوه یا استاذ •• انت مدرقتس ؟

محمود : وایه مصلحتہ ؟

فتحیه : لو كنت بعقلی ماحدش حیصنق انی ضربت فؤاد بیه من

غير سبب ، وفؤاد بیه خایف علی سمعته •

محمود : آه •• طلوعی مجنونه عشان کده •

فتحیه : ودفعوا لى مصاریف المحامی کمان •• وهما ماقالوش

مجنونه ، یعنی مجنونه ••

محمود : اضطراب نفسی •

فتحیه : ایوه ، وانا کان عندى ده صحیح •

محمود : مما قدروا يقنعوكى انتى كمان ؟

فتحية : استاذ .. انت زعلان منى ؟

محمود : أبدا .. ليه ؟

فتحية : عشان قلت ، قصدى المحامى بتاعى قال انك وزنتى .

محمود : للاسف ده شرف ما اقدرش ادعيه .

فتحية : مش فاهمة .. يعنى كنت بتتكلم جد لما قلتلى اضربيه ..

محمود : انتى فهمتى ايه ؟

فتحية : ماعرفتش بتتريق ولا بتتكلم جد .

محمود : امال ايه اللى خلاكى تحاولى تضربيه فعلا ؟

فتحية : مش عارفه .. كان عندى اسمه ايه ده ، الاضراب ..

النفسى .

محمود : آه ، ولوقتى عقلتى ؟

فتحية : الحمد لله على اى حال .. المهم انت يا استاذ .

محمود : لأ أنا مش باين على ح اخف .

فتحية : مااقصدش .. أنا متأثره اكمنى طلعت منها وحضرتك .

اللى اتظلمت من غير سبب .

محمود : تصورى .. مع ان اللى يحرض مجنونة يبقى اكيد .

مجنون زيها .

فتحية : آه والنبى عندك حق .. وماقلتش كده ليه وطلعت براه .

زيمى ؟ ولا اقوالك ما انت ممكن تستأنف .. تحب اكلم لك

المحامى بتاعى ؟

- محمود : كتر خيرك •
- فتحيه : والأستاذ محمد راخر ، لو كلمناه جايز يساعدنا •
- محمود : انت قلبك ابيض قوى يا فتحيه •
- فتحيه : الا صحيح .. انت مادافعتش عن نفسك ليه فى المحكمه ؟
- محمود : قوايلى انتى .. لسه بتفكرى فى التمثيل ؟
- فتحيه : وليه لا ..
- محمود : بعد كل اللى حصل ؟
- فتحيه : فؤاد بيه ماعندوش مانع يشغلنى •
- محمود : هايل .. يعنى اصطاحتوا •
- فتحيه : تقريبا .. ح آخذ دور الكومبارس •
- محمود : ياه .. كومبارس مره واحده ؟
- فتحيه : آه .. قالولى ده الدور اللى اليق فيه •
- محمود : مضبوط .. لكن انتى بتعرفنى تمثلى فعلا ؟
- فتحيه : وهى دى صعبه يا استاذ .. ماكل الناس بتمثل •
- محمود : معاكى حق •
- فتحيه : امثل وارقص .. واغنى كمان •
- محمود : تغنى ؟؟
- فتحيه : آه (تنهض وتغنى على الفور مطلع اغنية لام كلثوم) •
- محمود : جميل •

فتحيه : حافظه كل ادوار الست •

محمود : يا سلام ؟ وايه كمان ؟

فتحيه : وهى الست مش كفايه ؟

محمود : ما أقصدش •

فتحيه : قصدك شادية ولا نجاة ؟ واحفظهم ليه ، ما انا صوتى
أحلى منهم •

• (يظهر صادق عند الباب) •

صادق : لامواخذه يا متر (ثم محدثا شخصا بالخارج) اتفضل
يا معلم •

(يدخل تاجر اثاثات قديمة ، يرتدى بالطو فوق
جلباب) •

التاجر : بسم الله الرحمن الرحيم • • سلامو عليكم •

(التاجر يتفحص محتويات الحجرة • • يدق على

المكتب بقبضته) •

(محمود لا يلتفت له • • فتحية تبدو عليها

الدهشة) •

التاجر : والبيه عايز كام فى الشيله دى ؟

صادق : خليك معايا انا • • تعالى لسه فيه اوضه •

(صادق والتاجر يخرجان الى الحجرة الأخرى) •

فتحيه : انت حتبيع العفش يا استاذ ؟

محمود : المكتب كله • • تشتري ؟

فتحيه : لازم بقى مهاجر •

- محمود : كل شيء جايز .. انتى ناويه تعملى ايه ؟
- فتحية : ح أجرب حظى بره .. رايحه لبنسان .. عبده طلع لى
الباسبور خلاص .
- محمود : عبده كمان اللى عمك الباسبور ؟
- فتحية : وهو أنا لوحدى ؟ ده كل زمايلى اللى نجحوا فى مسابقة
الوجوه الجديدة .
- محمود : كده ؟ وفؤاد بيه مش طالع معاكم ؟
- فتحية : لا .. ححصلنا بعيدين .
- محمود : متأكدك انك حتملى وتغنى وبس ؟
- فتحية : لا طبعاً (تضحك) والذى منه .
- محمود : ياه .. ده انتى عقلتى خالص يا فتحية (يضحك) .
- فتحية : هما مش بيتقولوا للعقل زينه .. شسوف لما عقلت بقى
شكلى ايه (تستعرض ملابسها) .
- محمود : دى الزينه بس .. انما العقل فين ؟
- فتحية : الجشو طبعاً يا استاذ (وتطلق ضحكة ماجنة) .
- محمود : لكن ده جسمك يا فتحية .. مش عقلك .
- فتحية : آه ، انما اللى تغلب به اللعب به (تبضحك ثانية) .
- محمود : (لا يضحك) .
- فتحية : (نامضة) استاذن أنا بقى .. اشوف وشك بخير
يا استاذ محمود .
- (تمدها لتصافحه فيحتفظ بها) .

محمود : فتحية .. تسمحيلى اسالك سؤال ؟

فتحيه : اتفضل .

محمود : (بعد لحظة) مابتفكريش يكون لك بيت وراجل واطفال
و

فتحيه : (تضحك بمجون) احنا لسه حنحلم يا استاذ ، ماكبرنا
وفهمنا الدنيا .

محمود : وافرضى ان ده ممكن .

فتحيه : واعشم بروحي بالكذب ليه .

محمود : بتوكل افرضى .. وافرضى مثلا .. مثلا ان الراجل ده
انا .. توافقى ؟

فتحيه : (تسكت مبهوته ، ثم تقول) اوافق على ليه ؟

محمود : تتجوزينى .

فتحيه : (بتردد وارتيباك) وانت تتجوزنى ليه ؟

محمود : انا قلت مثلا .. ما تفكريش فى .. فكرى فيكى انتى ..
توافقى ؟

فتحيه : (تسكت) .

محمود : (بلا انفعال) يعنى لا .. طب ليه ؟

فتحيه : (تهز كتفيها) معرفش .

محمود : بتخافى منى ؟ بتكرهينى ؟

فتحية : يا خبر يا استاذ .. وانا ايش وصلنى لك .. طب ده
انت طيب وابن حلال ومش زى للتانيين .

محمود : امال ايه السبب ؟

فتحية : يمكن (بحيرة) ، اصل انا مش فاهمك .. توبك مش
من توبى .

محمود : (يهز رأسه وكأنه فهم)

فتحية : (بسرعة) بس ما تزعلش .. انت تتماك ألف واحده
أحسن منى .

محمود : (ببساطة) لكن فؤاد بيه ، أو عبده الريحيسير كنتى
توافقى .. مطلوب ؟

فتحية : انت زعلت يا استاذ ؟ .. يقطعنى .

محمود : بالعكس .. انا اشكرك عشان جاوبتيني بصراحة على
سؤالى .

فتحية : انما انت بتتكلم جد ولا عاوز تعرف وبس ؟

محمود : (بابتسامة) وانتى يهملك ايه مادام مش موافقه ؟
(لحظة صمت .. فتحية تحاول أن تقول شيئاً ..
تنظر له نظرة اغراء) .

فتحية : (بلهجة مختلفة) انت بتسهر فين بالليل ؟

محمود : بتسالى ليه ؟

فتحية : كنا نتقابل فى حته ، لو تحب يعنى .

محمود : (يبتسم) ما تنسيش الجوابات عشان اطمئن عليكى

فتحيه : (مضيفة) من لبنان ؟ طبعاً يا أستاذ .. بالحق مش عايز حاجه من هناك .. بلوفرات .. خلاطات .. خراطيش سجاير .. اطلب .

محمود : (يخلل على ابتسامته ويهز رأسه نفياً) .

فتحيه : (مصافحة) طب اتوك « اورفوار » دلوقتى .

محمود : مع السلامه يا فتحيه .

(يمشى معها حتى المدخل وينظر خلفها ويشرد)

(يدخل صادق والتاجر من الجرة الأخرى) .

صادق : هيه يا معلم .. قلت ايه ؟

(التاجر يدق على المكتب ثانياً ، يفتح الأدراج

وينقلها) .

التاجر : صلى ع النبى .. مش لما ناسين كويس .. والكتب دى

بلا قائيه محتاجينهم ؟

صادق : (يتجه لمحمود ويهم بسؤاله) .

محمود : كله .

صادق : (للتاجر) شيل .

التاجر : هما مش لازمى .. بس انا بقول أخلصكم منهم .

صادق : طب خلصنا .. حتدفع كام ؟

التاجر : الصبر طيب .. ومن غير مؤاخذه الجرامفون ده يلزمكوا ؟

صادق : (ينظر لمحمود) .

محمود : كله .

صادق : شيل .

التاجر : بالاسطوانات طبعاً .. أنا قاصدى اخلصكوا .

صادق : خلصنا يا سيدى .. كام ؟

التاجر : اللى يقول عليه المتر .

صادق : أنا اللى بتكلم ممالك .

التاجر : (هامسا) هو الأستاذ بتاعكم متألف كده ليه ؟

صادق : أصله مايعرفش يفاضل .. خليك معايا .. قلت ايه ؟

التاجر : ميت احيى .

صادق : يفتح الله .

التاجر : قول يا باسط .. الفلوس مش كل حاجه ، والعين المليونه ربك يبارك لصاحبها .

محمود : (بضيق) أنا نازل .. ح أبقي أرجع بعد شويه تكون خلصت .

صادق : براحتك يا متر ..

(محمود يخرج) .

صادق : ايه يا معلم .. انت مش قايلى جوه ميه من غير الكتب والبيك آب ؟

التاجر : ميه وعشرين .

صادق : لا .. دا أنت شاطر قوى .. دى كتب قانون .

التاجر : ولو .

- صديق : وده ببيك آب ، والاسطوانات تسوي كثير .
التاجر : ولو .
صديق : آخر كلام ؟
التاجر : عشرين فوق الميه .
صديق : اسمحلي ، انت كده عايز تستغفل الأستاذ .
التاجر : عشرين للاستاذ ، وعشره علشانك .
صديق : يبقى عايز تستغفلى أنا .
التاجر : كويسه .. خليها عشره للاستاذ وعشرين علشانك .
صديق : واسعه يا معلم .
التاجر : مش بتقول فوضك فى البيعه ؟
صديق : ضميرى .. ده برضه عيش وملح .
التاجر : وايه اللى يرضى ضميرك ؟
صديق : قسمة الحق .. عشرين للاستاذ وعشرين لى .
التاجر : يفتح الله .. سلامو عليكم .
(التاجر يتحرك خارجا) ، (صديق يتحرك خلفه) .
صديق : طب اسمع بس ، استنى يا معلم .
(لكن نبيلة تدخل غدئذ .. صديق يتوقف بدهشة) .
صديق : الأستاذه ؟؟

- نبيله :** ازيك يا عم صادق .. امال فين محمود ؟
- صادق :** جاى حالا .. املا وسهلا اتفضلى .
- نبيله :** (لا تجلس) طمنى .. هو عامل ايه ؟ كويس ؟ والمكتب مقلوب كده ليه ؟
- صادق :** ماخلاص يا ست نبيله .. الامتاف بيبيع المكتب .
- نبيله :** مش ممكن .
- صادق :** امر ربنا .
- نبيله :** ليه ؟ ايه اللي حصل ؟ مستحيل .. لازم تمنعه .
- صادق :** كنتى فين يا استاذة نبيله ؟ حمد الله ع السلامه ..
- نبيله :** (باللم) اسكت يا عم صادق ، اسكت .
- صادق :** طب اتفضلى ارتاحى ، زمانه جاى .
- نبيله :** (تنور حول نفسها بتأثر) يبقى انا السبب .. انا السبب .
- صادق :** كله من تحت راس البت المهفوفه اللي اسمها فتحة .
- نبيله :** حصل حاجه تانى ؟
- صادق :** مش قالت ان الاستاذ محمود هو اللي حرصها تعتدى على فؤاد بيه .
- نبيله :** وبعدين ؟
- صادق :** حققوا مع المتر ، وجابوا رجله فى القضية ، وبعدين ...
- (يظهر مجمد داخلا .. صادق يراه فيثوقف عن الكلام) .

صادق : محمد بيه .. اهلا وسهلا .

نبيله : (تستدير وتفاجا) محمد ؟

محمد : ايه .. ماكنتيش متوقعه تشوفيني ؟ وصلتني مصر امتي
يا نبيله ؟

نبيله : ابارح بالليل .

محمد : والنهارده الصبح بقيتي هنا .

نبيله : ايوه ..

محمد : اتقدر افهم ليه ؟

صادق : (منسحبا دون ان يشعر ا به) عن افنكم .

نبيله : (ببرود) الناس بتقول في الاول حمدلله ع السلامه .

محمد : كلمتك في التليفون عشان كده .. مامتك قالت انك
خرجتي من غير ماتقولي لحد .. فهمت انك هنا .. ايه
اللي رجعت م الكويت ؟

نبيله : لاني ح اتطلق .

محمد : ليه ؟

نبيله : وهو ده سؤال ؟ ما انت عارف .

محمد : محمود طبعا (ويتلفت حوله) هو مش هنا ؟

نبيله : وايه دخل محمود في الموضوع ؟

محمد : دخله انك هنا عنده .

نبيله : (بتحفز) انت جاي تحاسبني ؟

محمد : انا جاي احميكي .

نبيله : ولما كنت ببعت جواب كل يوم ، محدش اتحرك م العيله
عشان يحميني ليه ؟

محمد : نحميكي من جوزك اللي ماکملتیش معاه شهرين ؟

نبيله : ايه الطريقة الغريبه دى اللی بتکلمنى بيها ؟

محمد : شوفى يا نبيله ، مهما كانت الاسباب اللی خلقت تسببی
جوزك ، فوجودك هنا دلوقتى مش صح .

نبيله : طظ فى الصح والغلط ونیکم کلکم ، کاکم کذابین منافقین ،
حيوانات .

محمد : نبيله .. امسكى اعصابك ، ايه اللی حصلك ؟

نبيله : (منفجرة) دلوقت بس بتسألنى عن اللی حصللى ..

لازم انهار او افقد عقلی عشان یبقى لى الحق انی اتکلم .

محمد : انا آسف لو كنت ضایقتك ، ده من خوفی علیکی ..
قولیلی جرى ايه ؟

نبيله : مقدرش .. مش ح اعرف اقول اى حاجه .

محمد : ما هو لازم تبررى اللى عملتیه ، الخناق والنفضیحة فی
اقسام البولیس ، والآخر تباتی فی السفاره عشان تنزك
مصر .. لیه ده كله ؟

نبيله : مش قادر تفهم لیه ؟ مقدرش تتصور ايه اللی ممکن
یحصل لى لما الاقوى نفسی فجاء فی ثلاث أيام فی حضن
راجل غریب فی بلد غریبه ؟ انسان تافه .. غبی ، حقیر ،
مايفرقش عن اى حیوان الا البدل اللی بیلبسها عشان
یغطی بیها قذارته وبشاعته .

محمد : طب اهدى يا حبيبتي .. اهدى وفهميني .

نبيله : (فى ثورة ثانية) لا .. مش لازم اقدم مرافعه .. مش لازم اذافع عن نفسى واقولكم مبررات .. كفايه انى رافضه اعيش معاه .. مافيش قوه تجبرنى اعاشر انسان بكرهه .

محمد : ماتنسيش ان الانسان ده انتى اللي اخترتيه .

نبيله : انت شمتان فى ؟

محمد : (مرتبكا) انا ما اتصدقش لكن ..

نبيله : ايوه ، انا وافقت .. ماكنتش فى حالة طبعية .. كنت بدمر نفسى .. كان لازم تحمونى .. امى اللي اتعذبت طول عمرها عشان اتجوزت راجل مابتحبوش اصرت انى اكرر نفس غلطتها ، ابويا كانه ما صدق اتخلص منى . وانت .. انت اللي بتقول انك بتحبينى ، جيت لى المافون وشهدت ع العقد .. كلکم بعتونى ..

محمد : وهو .. ؟ هو لسه بطل فى نظرك مش كده ؟ هو اللي اتخلي عنك وكان السبب فى كل اللي حصلك .. اتكلمى يا نبيله .

نبيله : كل اللي يهكم محمود .. انا مش مهمه .. دايما محمود .. محمود .. خبت النجاح والشهره والفلوس .. وهو خسر كل شىء ، حتى انا ولسه بتحد عليه ؟

محمد : (بقوه) لا يا نبيله .. ماتنظلمينيش ، انا عمري ماقدت على محمود .. بالعكس ، انا كنت بحبه زى اخويا .. ولحد آخر لحظه حاولت اساعده .. محمود كان عنده نفس فرصتى واحسن منها .. انا تعبت اكتر منه ..

ما عرفش الحرمان لللى عرفته ، ومع ذلك بيدعى انه بطل .
 انا اتمرمطت كتير وجعت كتير ، لكن هو الجوع والفقر
 كان بيعرفهم م الكتب يس . . مابقولش انه كان غنى ،
 وصحيح الفرق بين ظروفنا مكانش كبير . . لكن كان
 فيه فرق . . اللى وصلت له النهارده . . وصلت له بعد
 ماكانحت . . انما كل اللى فى دماغه كلام فارغ . .
 مالوش ظل م الحقيقه . . الحقيقه انه فاشل . . ايوه
 فاشل ، وفشله هو اللى خلاه يدور على دور يلعبه عشان
 يغطى بيه فشله وحتى الدور ماقدرش يمثله للنهاية ، كان
 يبخسر الناس ، كل الناس . . حتى الفقرا اللى بيطلع
 يدافع عنهم مجانا . . انتى بس يا نبيله اتخدعتى فيه . .
 افكرتى بطيية قلبك وسذاجتك انه فارس شهيم . .
 نبيل ، وانه شايلى للكون فى قلبه . . لكن الحقيقة غير
 كده . . الحقيقة انه انانى ، مغرور وحاقد ، الحقيقة
 انه

نبيله : كفايه يا محمد . . كفايه .

محمد : (مندفعاً بأمل) لا يا نبيله مش كفايه . . لازم تسمعنى
 للآخر ، انا مابكرهش محمود ، محمود هو اللى مبيحبش
 حد . . عنده اوهام مراعاة فى دماغه ، وعاييز يفرضها
 ع العالم . . عاييز كل الناس تبقى زيه . . فاكرا انه
 حيفير للكون . . انا شفت ناس كتير عندهم مبادئ
 ومثل . . ماحدش فيهم بالشكل ده . . وكلهم رايهم فيه
 وحش . . انا مابكرهش محمود . . لكن ماقتبلش يعمل
 بطل على حسابى .

نبيله : انت ما بتفكرش غير فى نفسك . . محمود تعبنا فعلا
 ماهاوش بطل ، لكن صادق ، مابيكذبش على نفسه . .
 محمود فى ازمه لأن كل شيء حواليه مغشوش . . وانا

دلوقتی اقدر انهم ايه اللي بيعتبه ، وانت كان لازم
تساعده بجل ماتقف ضده .

محمد : انا حاولت .. ولسه مستعد .. هو اللي رفض ايدى لما
مدتها .. هو اللي اختار يعادينى .. لكن انا ح اسامحه ،
علشانك يا نبيله .. انما لازم تنسيه وتبعدى عنه ..
مش ممكن اسيبه يحطك معاه .

نبيله : انت بتملى شروطك يا محمد ؟

محمد : لا يا نبيله ، ابدأ .. انا بقول ده اصلحته ، واصلحتك ،
ثم ، ثم لازم تنهمينى يا نبيله . ابنى صبرت واستحملت
كثير علشانك ، مش لازم اركع تحت رجلىكى علشان
تعرفى انى بحبك .

نبيله : الكلام ده مالوش لازمه .

محمد : وحياتى كلها من غيرك مالهاش لازمه ولا معنى .. محمود
مابيجيكيش ، لو كان بيعبك كان اتجوزك .. محمود
استغلك ، ويثبت انه احسن منى :

نبيله : انا ماسمحلكش ..

محمد : (مقتربا منها) المره دى انا اللي مش ح اسمح له ياخذك
منى .

نبيله : (بذمول) هى دى الخيانه اللي جاى تحمينى منها ؟

محمد : وانتى جايه هنا ليه .. بعد ما طردك وسابك راجعه له
هنا ليه ؟

نبيله : انا دلوقتى بس عرفت انا جيت له ليه .

محمد : انت لى يا نبيله .. لى انا مهما حصل (يطوقها
بذراعيه) .

نبيله : اوعى تلمسنى (تصفحه بقوة .. يقف ويتحسس خده
بذهول) .

(بينما يظهر محمود عند الباب دون ان يلحظه)

محمد : ماتفتكريش انك تقدرى تمثلى على الشرف .

محمود : (يتقدم ويقول بهدوء ولكن فى قوة) اطلع بره .

(محمد يلتفت ويراه فيشحب وجهه) .

محمود : بره .

(محمد ينظر له بحقد هائل ، ثم يخرج مسرعا)

نبيله : محمود .. سامحنى يا محمود .. انا عذبتك فوق عذابك ،
مقدرتش افهمك .. ما فكرتش غير فى نفسى .

محمود : انتى اللى تسامحينى يا نبيله .. انا فرطت فيكى .

نبيله : كان لازم تحرقنى النار عشان اعرف وافهم .. لكن ادينى
أهو رجعت لك ، وما فيش حاجة تخلينى اسيبك .

محمود : يا حبيبتى (يقبل يدها) ما قتلش جيتى امتى وازاى ..
والكلب ده كان عايز منك ايه ؟

نبيله : جه ورايا عشان بيعفنى عنك ، ولما يئس اتهم على زى
الحيوانات .

محمود : أنا مش قادر اصبر انك هنا .. وفى اللحظة دى بالذات
وكل شىء فى حياتى بينهار .

نبيله : مستحيل .. مش انت اللى تسلم .

محمود : النهارده بصفتى حسابى القديم .. اتهيلالى انى شفت
بعنيا هزيعتى .. مش عارف ليه الخطوة اللى بعد كده ..
وفجاه توصلى انت كائنك معجزه .

نبيله : يبقى كل اللى عملته مارحش مدر .. كان لازم اقاوم كل
دقيقه وكل ثانیه عشان اوصل دلوقتى والقاك .

محمود : تعالى يا نبيله احكىلى .. من يوم ما سافرتى ماسمعتش
عك اى حاجه .

نبيله : مش عايزه افكر .. انا خلاص .

محمود : اتعلقتنى ؟

نبيله : سببت .. انما لازم حيطلقنى ، ولو غصب عنه ..
ماحتش يقدر يستعبدنى .

محمود : اظن اقدر اتخيل لوحدى .. وللدرجه اللى تخلىنى اخجل
من نفسى .

نبيله : انا اللى سلمت .. انت مالكش ذنب .

محمود : كان بيضربك .. بيهينك ؟

نبيله : ارجوك يا محمود .. بلاش تفكرنى .. ساعنى اناكمان
عشان ما اخجلش من نفسى .

محمود : (يرفع راسها بانامله وينظر فى عينيها فتبكي بقوة)
نبيله ...

نبيله : مش ح اغفر لنفسى ان حد غيرك اسنى .

محمود : (محاولا ان يتحكم فى عواطفه) ليه ماقتلتيش قبلها
يا نبيله .

نبيله : بعث لك عشان تحضر كتب الكتاب .. لو كنت جيت ،
لو كنت كلمتني في التلفون .. كنت سبتهم وهربت .

محمود : الوقت كان فات .. ولا كنت اتخيل ان كل شيء يحصل
بالسرعه دي .. في الاول افكرتك اتجوزتي محمد .

نبيله : مستحيل .

محمود : ليه .. مش ساعتها كنتي بتحتقريني ..

نبيله : ابدأ .. ماكنتش بنتقم منك .. أنا كنت بنتحر ..
بعذب نفسي عشان اخليك تفحم وتحس بالآلم اللي
حسيتها .

محمود : يعني ما فكرتيش في محمد ابدأ ؟

نبيله : ولا لحظه .. هو نفسه مكانش عنده الشجاعه اللي تخليه
يطلبني .. لقاها فرصه يضربك حتى ولو على حساب
نفسه .. كل اللي قدر يعمله انه يجرى يجيب لي الأذن
قبل ما أرجع في كلامي ويمضي على العقد وايده
بترتعي .

محمود : لما جاني الخبر قلبي غاص جوايا واتخنقت .. ولما
عرفت انه مش محمد حسيت بعذاب افطع .. يمكن
تستغربي .. لكن دي الحقيقه .. عذاب من نوع غريب
ما أقدرش أوصفه .. لو كنتي اتجوزتي محمد كانت
المسأله اتحسنت .. مكانش حبيبي فيه معنى لحاجه
بعدها .. كنت وصلت للياس اللي الانسان يرتاح بعده .

نبيله : وده نفس اللي حاول محمد يعمله دلوقتي .. كان متأكد
ان محاولته معايا مالهاش فايده .. لكن حب يوصل كل
شيء للأخو .. يقطع آخر خيط بيثا .

محمود : انتى كان عندك حق- يا نبيله .. فاكرو اول يوم دخلنا
هنا نفقرج على الشقة ؟ فاكرو قلتيلى ايه ؟ قلتي انك
خايفه .. وان محمد شيء وانا شيء ، وكل واحد غير
التانى خالص .

نبيله : ايوه .

محمود : ازاي عرفتى كل ده من بدرى ؟

نبيله : قلبي كان حاسس .

محمود : كنت فاكرو لسه اقدر اتكيف مع الدنيا والناس .. حاولت
وفشلت .

نبيله : انت مافشلتشي يا محمود .

صادق : (داخلا) استاذ محمود .. لامواخذة ، اصل التاجر
مارضيئش غير بـ ...

محمود : (بسرعة) مش مهم .

صادق : طب سياذتك تفضى بس ع المايعة .

محمود : هات (يوقع له على الورقة بسرعة) .

صادق : هو يمكن بييجى يشيل بكرة .. عن انك اروح اخلص
معاه .

محمود : تقدر تروح انت كمان يا عم صادق .. ومفتاح المكتب
أهو .. يمكن بكرة تيجوا ماتلاقونيش .

صادق : (بصوت مخفوق) أمرك يا هقر (يخرج صادق ويسمع
صوت اغلاق الباب الخارجى) .

(نبيلة تفشل فى كبح دموعها) .

محمود : انتى طبعا عرفتى باللى حصل فى القضية •

نبيله : لا .. كنت سافرت .. حققوا معاك ؟

محمود : والحكم صدر كمان .. شهرين حبس •

نبيله : مش ممكن •

محمود : مع وقف التنفيذ •

نبيله : يعنى ايه ؟

محمود : يعنى حكم يفضل يلاحقنى زى ضلى .. حكم ع المستقبل كله •

نبيله : ليه ؟ انت عملت ايه .. حرضت البحث دى فعلا ؟

محمود : قلت لها راى بصراحة فى قضيتها .. يمكن حتى كنت بقوله لنفسى •

نبيله : وماذا فعتش عن نفسك ؟

محمود : فكرت .. حضرت مرافعة طويلة .. ويوم الجلسة بسكت ..

نبيله : خالص ؟

محمود : خالص •

نبيله : (بعد لحظة صمت طويلة) والقضية الثانية ؟

محمود : قصدك الأولانى •

نبيله : ايوه •

محمود : اتاجلت (لحظة صمت) •

نبيله : كل مشاريعنا واحلامنا متاجله ، ومافيش شىء واحد
فى حياتنا حقيقى .

محمود : الا حبنا (يقبل اطراف اصابعها) .

نبيله : (تسند رأسها الى صدره) حتى جنبنا .. مع وقف
التنفيذ .

(ظلام بطىء) .

* * *

المشهد الأخير

- بعد مرور نصف ساعة .
- حجرة المكتب خالية ومعتمة ، ضوء يأتي عبر الزجاج العلوي لباب الحجرة اليمين وهي مغلقة .
- فستان نبيلة ملقى باهمال على الأريكة ، على الأرض فردة من حذاءها .
- بعد لحظة يسمع صوت باب الشقة الخارجى .
- يفتح ، ثم يظهر عم صائق وينير الردهة .

صادق : انا عارف ايه لزمة العجله دى .. تفرق ايه يعنى النهارده
من بكره .

التاجر : الله .. انقوا بيعتوا وانا اشتريت .. يبقى حقى .

صادق : على اى حال ، المتر اهو مش هنا .. اتفضل شيل .

التاجر : انزل ائده للشىالين .

(يخطفى التاجر .. صادق يدخل ويشعل النور)

ثم ينشغل فى عد اوراق مالية) .

(ينقطع فى الحال الضوء الواصل من حجرة

اليمين) .

(يدخل رجل فى حوالى الاربعين .. اصلح ..

عيناه زائفتان) .

الرجل : ده مكتب محمود عبد المجيد ؟

صادق : كان .. مين حضرتك ؟

الرجل : (يدور بعينه فى المكان) فيه واحده جت هنا من شويه ؟

(ثم يلمح فستان نبيلة فينقض ويمسك به) .

صادق : (بدهشة) ايه ده ؟

الرجل : هي فين ؟ (يدور حول نفسه ويزعق) اطلعى يا نبيله .

صادق : مش كده يا حضرة .

الرجل : اوغى (يدفع صادق ويندفع الى حجرة اليمين ويقتحمها) .

صادق : (مذهولا وقد بدا يفهم) لا حول ولا قوة الا بالله ..
يا رب استر .

(تسمع ضجة مصدرها الرجل وصراخ نبيلة ..

صادق يتحرك نحو الحجرة) .

(لكن يبرز الرجل بظهره وهو يحاول جذب نبيله)

الرجل : اتفضلى فوتى قدامى •
(يظهر جانب من جسد نبيلة فى قميصها الداخلى
ويدها ممسكة بالباب فى استماتة •• الرجل
يشدها من شعرها بقوة •• تظهر رأس نبيلة ،
ثم تنجنب بكاملها وهى تصرخ من الألم والفرع ،
رأسها منكسة تحت ضغط قبضة الرجل ويدها
تحاول أن تلملم ملالة قصيرة حولها) •

الرجل : انتى حتمشى ولا لا •
نبيله : (مستنجد بصوت مرتفع) محمود •

الرجل : ولك عين يا ناجره •
(يصفعها بقوة •• تفقد توازنها وتسقط على
وجهها امام الأريكة ، تزحف وتستند عليها) •
(يظهر محمود فى باب حجرة اليمين ، شعره
مهوش وقميصه مفتوح) •

محمود : (لاهتا) سييها •• لوعى تلمسها •

الرجل : لو قربت حقتك واقتلها •

محمود : ماتقدرش •• فيه قانون •• انده البوليس •
الرجل : القانون يخلىنى امتلككم •• لكن خليك انت القانون •
(يجذب نبيلة من شعرها) امشى قدامى •

نبيله : (صارخة) سيبنى •• طلقنى •• طلقنى •

الرجل : مش ح اطلقك •• ح افضحك •• ح اوريكى الذل الللى
عمرك ما شفتيه •

محمود : (يهم بالتقدم نحو الرجل .. فى الوقت الذى يدخل فيه
التاجر واثنان من الحمالين) .

الرجل : (يشهر مطواة فجأة) خليك عندك .

محمود : (يتوقف) .

نبيله : (تحاول انتهاز الفرصة لكى تنفلت الى محمود) محمود .
(الرجل يجذبها من شعرها فتسقط على ركبتها) .

محمود : (مستجمعا غييمته) سيبها .

الرجل : (يضع المطواة على رقبة نبيلة) تعال لو كنت راجل وأنا
أبجها قدامك .. أذى عشيقك .. لو كان راجل يدافع
عك ، يحميكي .

(ثم يجر نبيلة على الأرض وهى تقاوم) .

محمود : امسكوه ، ماتخليهوش يخرج ، اقفلوا الباب .
(صادق والحمالان يتجركان لاعتراض الرجل) .

الرجل : (بشراسة) اوعى انت وهو .. ماحدث يقف فى سكتى
دى مرأتى وأنا حر فيها .

(الثلاثة يتوقفون عن الحركة .. الرجل يستدير مهددا
محمود بالمطواة فيترجع .. نبيلة تصرخ) .

نبيله : محمود .. محمود .

(الرجل يشق طريقه بها خارجا من وسطهم وتنحسر
عنها الملاءة .. وضراخ نبيلة يبتعد) .

محمود : (محاولا الاندفاع للخارج) نبيله .
(ثم يستدير نحو الموجودين) .

محمود : وراء .. ماتسيبيو هاش .. ساعدوني .. فى ايده
سكينة .

التاجر : (للحمالين) شيلوا بسرعة .. مالفاش دعوه .. احنا
اشترينا .. اتحرك انت وهو .. انا شارى كل
حاجه هنا .

محمود : عم صادق .

صادق : (يدق كفا بكف بتاثر) لا حول ولا قوة الا بالله ..
لا حول ولا قوة الا بالله .

محمود : (يهم بالخروج ثانية ثم يتوقف يائسا وهو ينتفض) .
(التاجر والحمالان يندفعان بالأثاث من أمامه وخلفه
ويصطدمان به ويلقون بالأثاث خارج الباب) .

التاجر : شهلوا يا اولاد الكلب .

(محمود يغطى وجهه بيده .. ثم هامسا نفسه فى حمى ..
ماكننش أقدر أعمل حاجه .. ما كنفش أقدر) .
(الحمالان يرفعان المكتب بسرعة .. تسقط فتاحة الأوراق
من فوقه وتستقر أمام قدم محمود) .

(محمود ينحنى ويلتقطها وينظر فيها متأملا) .
(التاجر والحمالان وصادق يخرجون .. وتبقى الحجرة
عارية الا من بقايا أوراق وأسطوانة كسرت .. وأشياء
أخرى مهملة وملائة ثييلة) .

(محمود يقبض على الفتاحة بقوة وكأنما خطر له خاطر
ثم تتراخى قبضته وتسقط منه الفتاحة) .
(محمود يرفع الملاء ويدفن فيها وجهه ويندفع فى البكاء
مثل طفل زاعقا بصوت عال يتردده صدى الفراغ وجسده
يترنج تحت وطأة الانفعال) .

(ستار النهاية)

رقم الايداع ٨١/١٨٠٣

دار مساجد للطباعة


٢٠ شارع بلال بالقصيرين - الوايلي - القاهرة

« هذا الكتاب »

الفكرة الشائعة عن مسرحيات لينين الرهلى أنها من لون الكوميديا ، رغم ما تتخلل هذه المسرحيات من لحظات مأساوية • اما (الكلمة الآن للدفاع) فهي دراما اجتماعية تتخللها لحظات كوميديية ، وهى تعد من أولى أعمال المؤلف فقد كتبت عام ١٩٧٣ الا أنه لم يقرر حتى الآن عرضها على خشبة المسرح ربما لانها تجربة متميزة تحتاج الى ظروف فنية خاصة لتقديدها •

الشمخصية الرئيسية هنا محامى شاب يطمح الى المثالية وعندما يصطدم بواقع المجتمع يدفعه الشعور بالاحباط الى سلسلة من ردود الافعال تنسم بالفراغة •

Bibliotheca Alexandrina



0486668



دار الوقف العربى

للصحافة والنشر والتوزيع

٧٨ شارع قصر العيني - ٢٨٢٧٩

ص ب ٢٤ دواوين / القاهرة